

# खाश शिष्योंक जरियल परमेश्वरक काम

## नई शिष्यक चुनाव

(प्रेरितों १:१२-२६)

यीशुक स्वर्ग वापिस जाणक बाद उनार शिष्य फिर यरुशलेम आई। उनार नाम छी - पतरस, यहूना, याकूब, अन्द्रियास, फिलिप्पुस, थोमा, बरतोलोमी मती, हलफर्डक च्यल याकूब, शमौन जेलोतेस और दुसर याकूबक च्यल यहूदा। और उं रोज जॉम हबेर प्रार्थना करणाछी। इनर दगाड़ यीशुकि इज मरियम और भै लै छी, और थ्वाड़ दुसॉर स्यैणी लै छी।<sup>1</sup>

यैक थ्वाड़ दिनोक बाद, जब वां एक सौ बीस मैस जॉम है राछी, तब पतरसल इनर सामण ठाँड़ हबेर कौ, "तुम सबों कै मालुम छु कि युदस जो हम शिष्यों मिं बे एक छी, वील ध्वक दे और यीशु कै पकड़वा। यैक बाद जब उकें आपण गलित महसूस है, तब वील आत्म-हत्या करि ले। यैक लिजी हम वीक बदाव मिं एक दुसर मैस कै छांटनू, ताकी हम फिर बार है जूँल। लेकिन यौ जरूड़ी छु, कि उ मैस शुरु बे हमर दगाड़ रई हो, जब बे हम यीशुक दगाड़ छी। उ हमार दगाड़ यीशुक फिर ज्यून हुणक गवाह ठैरो।"

यैक लिजी उनुल यूसुफ और मत्तियाह नामक द्वी मैसों कै ठाँड़ करौ। और यौ प्रार्थना करी, "हे प्रभु, तुम सब मैसोंक मन कै जाणछा, यैक लिजी तुम हमुकें बताओ कि तुमुल यौ द्वी मैसों मिंबे आपण लिजी ककें छांटि रॉखौ,

<sup>1</sup> बाइबिलक अलग-अलग जाँगों मिं कै कैके नाम मिं फरक छु। यौ यैक लिजी छु कि जादे मैसोंक द्वी नाम छी। और थ्वाड़ लेखकोल उनर यौ नाम, और थ्वाड़ोँल उनर दुसर वाल नाम इस्तमाल करौ।

कि उ युदसक जाँग मिं तुमर बताई काम करि सको।" जब उनुल उनर नामकि परची खिती, तब उ मत्तियाहक नामकि निकई। यैक लिजी उ इग्यार खाश शिष्योंक दगाड़ शामिल हौ।

## मैंसों मिं पवित्र आत्मा उं

(प्रेरितों २:१-४०)

फसलक त्यार जकैं पेंतेकुस्तक त्यार लै कूनी, मिं जब यीशु मिं विश्वास करणी भौतै मैंस एक जाँग मिं जॉम है राछी। तब अचानक एक जोरदार हाव-ब्यावक अवाजल उ पुर घर भरी गोय। और उनुकैं आँगक समान अलग-अलग लपक देखीणाछी, और उं ऐबेर सब मैंसों मिं रुकि गोय। और उं सबों मिं पवित्र आत्मा ऐ और उं दुसेरि अलग-अलग भाषाओं मिं लै बुलाण लागीं।

तब भौत मैंस वां यौ देखणक लिजी आई कि यां के है रौ? और वां ऐबेर उनुल सुणौ, कि अरे, यौ मैंस हमेरि भाषा मिं परमेश्वरक महिमा करणई, जबकि हम अलग-अलग देशों बे यां ऐ रयूं, और अलग-अलग भाषा बुलानू! (किलैकि यौ बखत त्यारक कारणल यरुशलेम मिं भौतै मैंस जॉम है राछी) यौ देखिबेर उं दंग हबेर कूण लागी, "के यौ सब गलील प्रदेशाँक मैंस न्हैंतिना? फिर यौ के बात छु, कि हमुमिबे हरेक मैंस इनुकैं आपणि बोलि मिं बुलाण सुणणौ?" और उनुल एक दुसर धैं पुछौ, "यौ के हुणौ!" लेकिन थ्वाड़ मैंसोंल हसि करिबेर कौ, "उं शराब पिबेर नश मिं चूर है रई!"



मैंसों मिं पवित्र आत्मा उतरणै

यौ सुणबरे पतरसल जोर-जोरल कौ, "ओ यहूदियो और यरुशलेमाँक मैंसों, तुम मेरि बातों कैं ध्यानल सुणो। हमुल शराब नि पी राखि! लेकिन यौ उ बात छु जो योएल नबीक जरियल भौत साल पैली कई गेछी -

“परमेश्वर कूनी, “आखिरी दिनों में यस हवल कि मी आपण आत्मा सब मैसों कै द्यूँल।

और तुमार च्याल-चेली भविष्यबाणी करॉल और तुमार जवान दर्शन और बुड़ स्वीण देखॉल।

और जो लै मेरि सेवा करनी, मी उनुकै आपण आत्मा द्यूँल, और उं मैसों कै मेरि बात बताल।

यैक अलावा मी धरति और अगाश में आपण भौत ठुल-ठुल काम करुँल, और खून, ऑंग और धुड़ देखियल। सूर्ज अन्यार में बदई जॉल और जून खून जस लाल है जालि।

यैक बाद परमेश्वरक न्याय करणक दिन आल। और जो परमेश्वर कै धात लगाल, वी बचाई जॉल।”

ओ इस्रायलियो, यौ बात कै जाण लियो कि नासरत गौक यीशु एक यस मैस छन, जनुकै परमेश्वरल आपण तरफ बे भेजि रॉखछी। जनेरि पछ्याण यौ सामर्थाक और चमतकारॉक काम छन, जनुकै परमेश्वरल उनर जरियल तुमार सामण करिबेर दिखाई, जस तुम सब खुद जाणछा, किलैकि यौ सब तुमर बीच में हौ। और यौ यीशु कै जो परमेश्वरक मनसा पुर करणक लिजी पकड़ाई गो, उनुकै तुमुल सूली में लटकैबेर मारि दे। लेकिन परमेश्वरल उनुकै मरियों मेंबे दुबार ज्यून करौ! और मौत कै इदुक शक्ति नि छी कि उ उनुकै ज्यून हुण बे रोक सको।

जस हमर रॉज दाउदल भौत बखत पैली कै रॉखछी,

“मी हमेशा प्रभुक तरफ देखनै रूँल। किलैकि उं म्यर सामण छन, यैक लिजी मिक्के के परेशानी नि है सकनि।

यौ खुशील मी गीत गाणयूं, किलैकि परमेश्वर बे मिक्के एक नई ऑंश मिली।

उं म्यर प्राण कै अधोलोक में नि छोड़ॉल, और न मिक्के कबर में सड़न द्याल।

किलैकि तुमुले मिक्के जीवनक भल बाँट बता, और तुम म्यर दगाड़ रैबेर मिक्के खुशील भर दिंछा।”

फिर पतरसल यौ लै कौ, "दाउदल यौ सब आपण बारि में नि कौय, किलैकि उ मरौ और दफनाई लै गो, और वीक कबर आज तलक हमेरि बीच में छु। लेकिन उ जाणछी कि परमेश्वरल वीक दगाड़ वैद करि रॉखौ, कि परमेश्वर वीक वंश बे एक मैस कै वीक राजगद्दी में बैठाल। और वील

हुणी बातों कै पैलियै देखिबेर, हमर मुक्तिदाताक ज्यून हुणक बारि मिं यौ सब कौ, कि उ न तो अधोलोक मिं छोड़ि जॉल और न उकै सड़न दी जॉल। यौ तब पुर हौ जब परमेश्वरल यौ यीशु मसीह कै ज्यून करौ, जैक हम सब गवाह छन। वी हमर मुक्तिदाता छु! उं परमेश्वरक दैण हातक तरफ सबों है तुल पद मिं भैटी छन। परमेश्वरल उनुकै आपण पवित्र आत्मा दे, और जस परमेश्वरल वैद करि रॉखछी, उसिकै ऐल यीशुल यौ हमुकै लै दे। यौ वी छु जो तुम ऐल देखणाछा। यैक लिजी इस्रायलॉक सब मैसों कै जरूड़ जाणण चैं कि परमेश्वरल यौ यीशु कै जकै तुमुल सूली मिं लटका, उकै प्रभु और मुक्तिदाता द्विवै ठैरा!"

जब उं मैसोंल यौ बात सुणी, तब उनार मन भौत दुःखी हई। उनुल पतरस और दुसॉर शिष्यों धैं पुछौ, "दाज्यू, आँब हम के करनू?" तब पतरसल कौ, "पाप बे आपण मन फिराओ और तुम यीशु मसीक नामल पाणिक-बपतिस्मा लियो, जैल तुमुकै माफि मिलो और तुम पवित्र आत्माक बरदान लै पाओ। उ वैद सब मैसोंक लिजी छु, जनुकै परमेश्वर आपण पास बुलाल, चाहे तुम, तुमार नॉनतिन या दूर-दूर रुणिवाँल मैस कवे लै हो।" तब पतरसल भौतै लम्ब बखत तलक उनुकै जोर दी-दिबेर समझा कि आपुं कै यौ ट्याड़ मैसों कै मिलणी वालि सजा बे बचाओ।

## नई विश्वासी

(प्रेरितों २:४१-४७)

और जो मैस उ दिन उनर बातों मिं भरौस धरिबेर पाणिक-बपतिस्मा लिबेर उनार दगाड़ मिलीं, उनेरि गिनती तीन हजार छी।

उं एक दुसरक दगाड़ भेट-घाट करनै रंछी, और खाश शिष्यों धैं यीशुक बारि मिं सिखनै रंछी। उं लगातार प्रार्थना करछी, और एक दगाड़ मिलिबेर खाँण लै खाँछी। उनर समान लै साजक छी, और जनर पास समान छी, उं उकै बेचिबेर जस जनेरि जरवत हुँछी, उस उनुकै बाँट दिँछी। और उं हर बखतै परमेश्वरक भवन मिं ऐबेर उनर अराधना करछी। यैक अलावा खाश शिष्योंक जरियल भौत तुल चिन्ह और चमतकाराँक काम हई, उनुकै देखिबेर सब मैस भौतै दंग हई। और यौ देखिबेर भौत मैस यीशु मिं भरौस करण लागीं जैल उं बचि ग्याय।

## लुल मैसक भल हुण

(प्रेरितों ३:१-२६)

थ्वाड़ दिनोंक बाद जब पतरस और यहूना प्रार्थना करणक लिजी परमेश्वरक भवन में जाणाछी, तब वां परमेश्वरक भवनक सामण एक जनमक लुल मैस बैठिबेर भीख मांगछी। उ पतरस और यहूना कै वां उण देखिबेर उनुधैं भीख मांगण लागौ। पतरसल उधैं कौ, "हमर तरफ चा।" तब वील के मिलणक आशल उनर तरफ देखौ। लेकिन पतरसल कौ, "हमर पास सुन-चांदि न्हैं, पर जो हमर पास छु, उ हम तुकैं दिंनू। उठ, नासरत गौक यीशुक नामल घुम फिर!"

तब पतरसल वीक दैण हात पकड़िबेर उकैं ठाड़ करौ, और झट्ट वीक खुटों और जांडड़ों में हिटणकि ताकत ऐ गई। उ उछलण कुदण लागौ, और परमेश्वरक महिमा करन-करनै पतरस और यहूनाक दगाड़ परमेश्वरक भवनक भितेर गो। तब सब मैसोल उकैं देखिबेर पछ्याण ले कि यौ परमेश्वरक भवनक भ्यार बे बैठिबेर भीख मांगणी मैस छु, और उकैं उछलण-कुदण और परमेश्वरक महिमा करण देखिबेर उं दंग रै गयाय। और यैक लिजी वां भौत जादे भीड़ जॉम है गई।

पतरसल यौ मैसों धैं कौ, "ओ भाइयो, तुम इसिक किलै चाणाछा, कि हमुल आपण ताकतल यौ मैस कै भल करौ? यस न्हैं, लेकिन हमुल यौ यीशुक शक्तिल करौ! हमर पुरखा इब्राहीम, इसहाक और याकूबक परमेश्वरल यीशु कै भौतै आदर दे, लेकिन तुमुल उनुकैं मरवै दे। उं पवित्र, न्यायी और निष्पाप छन! राजपाल पिलातुसल लै उनुकैं छोड़णक लिजी कौ, लेकिन तुमुल उधैं बिनती करी, कि यीशुक बदाव हमर लिजी एक खूनी कै छोड़ि दिओ। तुमुल जिन्दगी कै दिणिवाँल कै मरवै दे, लेकिन परमेश्वरल उनुकैं मरियों मिंबे दुबार ज्यून करौ, जैक हम सब गवाह छूं।<sup>2</sup>

यौ लुल मैस कै ताकत और चंगाइ यीशु में विश्वास करणक जरियल मिली, जकैं तुम सब देखणाछा। ओ भाइयो, मी जानू कि तुमुल और तुमार अधिकारियोँल यौ काम यैक लिजी करौ किलैकि तुमर समझ में यौ बात नि आइ, कि उं को छन। लेकिन जो बातों कै परमेश्वरल आपण सेवकोंक

<sup>2</sup> हर साल में राजपाल यहूदियोंक लिजी एक कैदी कै छोड़छी। वील यहूदियों धैं पुछौ कि के मी तुमर लिजी यीशु कै छोड़ि द्यूं? लेकिन उनुल कौ, "ना, ना, बिल्कुल ना! तैक बदाव में हमर लिजी बरअब्बा कै छोड़ि दियो!" यैक लिजी यीशु जो निष्पाप छी, उं मारी गयाय, जबकि बरअब्बा जो खूनी छी, उ बचि गोय।

जरियल पैलियै कै रॉखछी, कि हमर मुक्तिदाता कै दुःख-पीड़ उठूण पड़ेलि, उकै परमेश्वरल इसिक पुर करौ। यैक लिजी आँब तुम आपण मनोँ कै बदइबेर परमेश्वरक तरफ लौट आओ, जैल तुमार पाप माफ करी जाओ। तब यस दिन आल, जब परमेश्वरक जरियल तुमेरि आत्मा कै लै तरो-ताजगी मिलेलि, और परमेश्वर यीशु कै, जो हम सबोक मुक्तिदाता ठैरौ, दुबार भेजो।" लेकिन ऐल उनुकैँ स्वर्ग मिं उ बखत तलक रुण छु, जब तलक परमेश्वर सब चीजोँ कै नई नि करि लियो।

जस मोशेशल कौछी, "प्रभु परमेश्वर तुमर भैनों मिंबे म्यर जस एक सेवक ठाँड़ करल, और जे लै उ तुमुधैँ कौल, तुम वीक सुणिया।<sup>3</sup> और जो मैस वीक बात नि सुणल उ नांश करी जाल।" इसिक जदुक लै परमेश्वरक सेवक आई, उ सबोल आजक यौँ दिनोंक बारि मिं लै बताछी। और जो वैद परमेश्वरल हमार पुरखोंक दगाड़ करि रॉखछी, उ वैद तुमर लिजी लै छु। परमेश्वरल इब्राहीम धैँ कौ कि त्यार वंशक जरियल संसारोक सब मैस आशीश पाल। और इब्राहीमक यौ वंश यीशु छु! परमेश्वरल उनुकैँ तुमर पास यैक लिजी भेजौ, कि तुम आपण खराब बाँट छोड़िबेर परमेश्वरक तरफ लौट आओ।"

## नेताओंक सामण पतरस और यहूना

(प्रेरितों ४:१-२२)

जब पतरस और यहूना मैसों धैँ यौ बात करणाछी, तब थ्वाड़ याजक, परमेश्वरक भवनक चौकदार और सदूकी दलोक थ्वाड़ धर्म गुरु लै इनर पास आई। उनुकैँ पतरस और यहूना कैँ देखिबेर भौत रीश ऐ रैछी, किलैकि उ मैसों कैँ सिखूणाछी कि मरी मैस यीशुक जरियल दुबार ज्यून हवाल। यैक लिजी उनुल पतरस और यहूना कैँ पकड़िबेर दुसर दिन तलक जेल मिं धरौ, किलैकि ऐल ब्याव है गेछी। फिर लै उ दिन भौतै दुसॉर मैसोल यीशु मिं भरौस करौ, और सब विश्वासियोंकि गिनती ऐल लगभग पांच हजार है।

दुसर दिन सब यहूदी नेता, प्रधान और धर्म गुरु महायाजकक दगाड़ भेट करणक लिजी गई। तब उनुल पतरस और यहूना कैँ वां बुलवैबेर बीच मिं ठाँड़ करिबेर पुछौ, "तुमुल यौ मैस कैँ कैक सामर्थल भल करौ?"

<sup>3</sup> मोशेशाँक यौ बात यौ अनुवाद मिं शामिल न्हैतिन, लेकिन तुमुकैँ बाइबिल मिं व्यवस्था-विवरण १८:१५ मिं मिलाल।

पतरसल पवित्र आत्माक सामर्थल कौ, "हे महारॉजो, किलैक हमुल एक कमजोर मैसक लिजी भल करौ, यैक लिजी तुम हमुकें पूछताछ करणक लिजी पकड़िबेर यां ल्यै राछा। ऐल तुम और सबों कें मालुम है जाण चैं, कि यीशु मसीक नामल यौ मैस भल है रौ। तुमुल उकें सूली मिं लटका, लेकिन परमेश्वरल उनुकें मरियों मिंबे ज्यून करौ। यौ वी यीशु छु, जकें तुमुल बेकार समझौ, लेकिन परमेश्वरल उकें सबोंहै खाश ठैरा! इनर अलावा और क्वे नहैं, जो हमुकें बचै सको।"

उनेरि बात सुणिबेर यहूदी दंग है ग्याय कि शिष्य इदुक निडर हबेर आपणि बात बतूणई, जबकि उं कम पढ़ी-लेखी छन। तब उनुल सोचौ कि उं यीशुक दगडु छन, यैक लिजी यौ हुणौ। और उ भल हई मैस कें उनर दगाड़ लै ठाड़ देखिबेर उनुकें के कूण नि आइ। यैक लिजी उनुल पतरस और यहूना कें भ्यार जाणक हुकुम दे। वीक बाद उं सब आपस मिं बात-चीत करण लागीं, कि हम यौ मैसोंक दगाड़ के करनू? किलैक इनर जरियल एक देखि जाणी सामर्थक काम है रौ, जो यां मैसोंक सामण छु। और हम लै यकें अणदेखि नि करि सकन। लेकिन हम इनुकें डरैबेर कूल कि तुम फिर यीशुक बारि मिं क्वे लै मैसोंक दगाड़ बात-चीत झन करिया।

तब उनुल पतरस और यहूना कें बुलैबेर उनुकें डरै-धमकैबेर कौ, "तुम यीशुक नामल और क्वे मैसोंक दगाड़ न बात करिया और न उपदेश दिया।" लेकिन पतरस और यहूनाल उनुकें जवाब दे, "तुम यौ बातक फैसाल करो, कि हम परमेश्वरक हुकुमक जांग मिं वीक बदाव के तुमेरि बात कें माननू? किलैक जो हमुल देखौ-सुणौ, उ हम मैसों कें नि बतूं, यस नि है सकन।"

तब उनुल पतरस और यहूना कें और जादे डरा, और मैसोंक डरिल उनुकें बिन सजा कें छोड़ि दे। किलैक शिष्योंक काम कें देखिबेर मैस परमेश्वरक महिमा करणाछी। जो मैस चंग हैरौछी, वीक उमर चालीस साल है जादे छी, और उ जनम बे लुल छी।

## विश्वासियोंक मेल-मिलाप

(पेरितों ४:२४-३६)

जब पतरस और यहूना जेल बे छुटीं, तब उनुल वापिस आपण दगडुवोंक पास ऐबेर उनुकें बता कि नेताओल उनुधैं के-के कौ। तब उनुल एक मन हबेर जोर-जोरल परमेश्वर धैं प्रार्थना करी, "हे प्रभु परमेश्वर, तुमुलै अगाश, धरति, समुद्र और जे लै यैमिं छु, उ सब बणा। पवित्र-आत्माक जरियल हमर पितर दाउदल कौ,

“संसारोंक मैंस लाल-पिडव हुणई,

और दुनियाँक सब सैप परमेश्वर और उनर ठैराई मुक्तिदाताक  
खिलाफ ठाँड़ हुणई। उं यौ बेकूफीक काम किलै करणई?”

और यौ बात पुर है गे, किलैकि हैरोदेस और पिलातुसल अन्य जातियों  
और इस्रायलियोंक दगाड़ तुमर पवित्र सेवक यीशु कै मारणक मशौद करौ।  
लेकिन जो लै उनुल करौ, उ तुमुल पैलियै ठहरै राँखछी। आँब, हे प्रभु, तुम  
दूखो कि उनुल हमुकै कसिक डरा। और ऐल तुम हमुकै हिम्मत दियो  
कि हम तुमर बचन कै निडर हबेर मैंसों कै सुणै सकूँ। और हमुकै यीशुक  
सामर्थल चमतकार करणकि शक्ति दियो।”

जब उनेरि प्रार्थना खतम है, तब उ जाँग हिलण लागीं और उं सब पवित्र  
आत्मा ल भर ग्याय। यैक बाद उं और लै निडर हबेर परमेश्वरक बचन मैंसों  
कै बतूण लागीं।

उं सब आपस मिं एक मन है ग्याय और उं आपण धन-दौलत साजक  
मानछी। और उं सबों मिं परमेश्वरक आशीश छी। उनुमिं क्वे गरीब नि  
छी, किलैकि जनर पास जाँग या घर छी, उं उनुकै बेच-बेचिबेर डबलों कै  
खाश शिष्योंक सामण धरछी, और उं उकै जरूरतक हिसाबल मैंसों कै बाँट  
दिंछी। जस यूसुफ नामक एक मैंस छी, जैक पास थ्वाड़ जमीन छी, लेकिन  
वील उकै बेचिबेर उं डबल खाश शिष्यों कै सौप देई।

## झुट लगूणकि सजा

(प्रेरितों ५:१-११)

फिर एक मैंस जैक नाम हनन्याह छी, उ और वीक स्यैणि सफीराल  
आपस मिं बात-चीत करिबेर आपण थ्वाड़ जमीन बेची। उनुल जमीनक दाम  
बे थ्वाड़ डबल आपण लिजी बचै लेई, और बकाइ रुपै लिबेर पतरस कै यौ  
कैबेर देई कि यौ लियो, यौ हमर गड़ाँक डबल छन। लेकिन पतरस कै पवित्र  
आत्माक जरियल पत्त लागौ, कि उ झुटि लगूणौ। यैक लिजी वील हनन्याह  
धैँ कौ, "तु शैतानकि बात सुणिबेर परमेश्वर कै ध्वक किलै दिणौछै! के जब  
तलक उ जमीन बेची नि रैछी उ तेरि नि छी, बेचीणक बाद लै के उ डबल  
त्यरै नि छिया? तब त्वील आपण मन मिं यस करणक विचार किलै सोचौ,  
कि हम झुटि लगैबेर जमीनक डबलों मिंबे थ्वाड़ डबल चुपचाप आपण  
लिजी बचै लिनू?" यौ सब सुणिबेर हनन्याह भिं मिं छुटौ, और वील दम तोड़  
दे।



तब थ्वाड़ जवानोंल ऐबेर उकै कपड़ मिं लपेटौ और भ्यार लिजैबेर दफनै दे। और सब जनुल यौ बात सुणी, उं भौतै डरि ग्याय।

यैक तीन घन्टक बाद हनन्याहकि स्यैणि सफीरा लै वां ऐ। उकै आपण बैगक मौतक बारि मिं के पत्त नि छी। पतरसल उधैं पुछौ, "के तुमुल जमीन इदुकै डबलों मिं बेचछा?" वील जबाब दे, "होई, इदुकै मिं बेची।" तब पतरसल कौ, "यौ के बात छु, कि तुम द्विनौल परमेश्वरक आत्माक इम्तिहान लिणक सोची? देख, त्यर बैग कैं दफनूनियोंक खुटक अवाज द्वार तलक ऐ गे, आँब उं तुकै लिबेर जॉल।" तब उ च्याट वीक खुटॉन मिं छुटी और वील लै दम तोड़ दे। तब दफनूनियोंल भितेर ऐबेर उकै लै मरी पा, और भ्यार जैबेर उकै लै वीक आदिमक दगाड़ दफनै दे। यौ घटनाल सब मैसों मिं डर छै गोय।

## खाश शिष्योंक चमतकार

(पेरितों ५:१३-१५)

खाश शिष्योंल मैसोंक बीच मिं ठुल-ठुल चमतकारॉक काम दिखाई, और यौ सब विश्वासी मैस परमेश्वरक भवन मिं एक दगाड़ जॉम हुंछी। दुसॉर यहूदी मैसोंक नजर मिं उनेरि भौत इज्जत छी, लेकिन उं उनर पास उण मिं डरछी। तब लै यीशु मिं भरौस करणी मैसोंक गिनती रोज-रोज बढ़नै जाणैछी। खाश शिष्योंक ठुल-ठुल चमतकारॉक कामोंल वांक मैस आपण घरॉक बिमारों कैं लै बाँट मिं यैक लिजी धरछी, कि अगर पतरसक स्योव लै इनुमिं पड़ि जॉल, यौ भॉल है जॉल। और आँश-पासक सब गौनों बे बिमार और भूत लागीं मैसों कैं लै खाश शिष्योंक दगाड़ भेट करूणक लिजी मैस उनुकै लिबेर उंछी, और उं सब आपण रोगों बे भॉल है जाछी।

## शिष्यों मिं सताव

(पेरितों ५:१७-४२)

लेकिन यौ सब कारणल महायाजक और धर्म गुरुओंल जलनक कारणल खाश शिष्यों कैं पकड़िबेर जेल मिं बन्द करि दे। पर रात मिं परमेश्वरक दूतल उनुकै भ्यार निकालिबेर कौ, "तुम यांबे परमेश्वरक भवन मिं जैबेर मैसों कैं यौ नई जीवनक बारि मिं बताओ!" यैक लिजी उं रात्ति पर परमेश्वरक भवन मिं जैबेर मैसों कैं फिर उपदेश दिण लागीं।

और दुसर तरफ महायाजकल न्यायालयकि सभा बुलवै, और उनुकै जेल बे खाश शिष्यों कै वां बुलूणक हुकुम दे। पर जनुकै उनुल बुलूणक लिजी भेजि रॉखछी, उनुकै जेल मिं क्वे नि मिल। जेलॉक द्वार तो भली कै बन्द छी, चौकदार लै वै छी, लेकिन शिष्योंक के पत्त-पाणि नि छी!

तब महायाजक और परमेश्वरक भवनक चौकदारोंक सैप यौ सुणिबेर फिकर करण लागीं कि ऑब के हवल! पर कैलै ऐबेर उनुकै बता, "जो मैसों कै तुमुल पकड़िबेर जेल मिं खिति रॉखछी, उं परमेश्वरक भवन मिं मैसों कै उपदेश दिणई!" तब चौकदारोंक सैप आपण मैसोंक दगाड़ गो, और खाश शिष्यों कै सभा मिं ला। उं उनुकै बौथ्यैबेर ल्युणौछी, किलैकि उं मैसों कै देखिबेर डरणाछी कि कै उं हमुकै ढुडल नि मारो।

तब महायाजकल शिष्यों धैं पुछौ, "के हमुल तुमुधैं यौ नि कै रॉख छिया कि तुम यौ यीशुक बारि मिं मैसों कै उपदेश नि दिया? फिर लै तुमुल सॉर यरुशलेम मिं यौ उपदेश फैलै दे, और तुम हमुकै यीशुक खूनक जिम्मेदार बणूणाछा!"

यौ सुणिबेर पतरस और दुसॉर खाश शिष्योंल कौ, "हमर लिजी तुमर है जरूरी, परमेश्वरक हुकुम मानण छु। किलैकि हमर पुरखोंक परमेश्वरल, यीशु मसीह कै दुबार ज्यून करौ, जनुकै तुमुल सूली मिं लटकैबेर मारि देछी। और उनुकै परमेश्वरल प्रभु और मुक्तिदाता ठैरैबेर आपण दैण हातक तरफ उंच्च जांग मिं बैठा, कि उं इस्रायलियों कै आपण पापों बे मुड़णक मौक और माफि लै दियो। हम सब यैक गवाह छूं। उसै पवित्र आत्माक लै, जो परमेश्वरल आपण मानणिवाँलों कै दी रॉखी।"

लेकिन जब महायाजक और धर्म गुरुओंल यौ बात सुणी, तब उं रीशल लाल-पिडव हबेर उनुकै मारणक लिजी तैय्यार है ग्याय। लेकिन गमीएल नामक एक धर्म गुरुल जैक सब मैस इज्जत करछी, वील सभा मिं ठाँड़ हबेर कौ, "उनुकै थ्वाड़ देरक लिजी भ्यार करि दियो।" तब उनुल उसै करौ।

यैक बाद गमीएलल कौ, "इस्रायली मैसों, तुम इनर दगाड़ जे लै करला, सोच-समझिबेर करिया। किलैकि थ्वाड़ बखत पैली थियूदास नामक मैस यौ दाव करिबेर ठाँड़ हौ कि मी लै के छूं, और लग-भग चार सौ मैस वीक पछिल गेई। लेकिन उ मारी गोय, वीक बाद वीक शिष्य लै तितर-बितर है ग्याय, और फिर उनर के नाम निशाण नि रौय। थियूदासक बाद यहूदा नामक एक दुसर मैस ठाँड़ हौ, और भौत मैस वीक पछिल है ग्याय, पर वीक

मरणक बाद उं सबनक लै जड़-टुक के नि रौय। यैक लिजी मी यौ मामुल मिं तुमुधैं कून् कि तुम इनर दगाड़ के मतलब नि धरो, किलैकि अगर यौ काम मैसोंक तरफ बे ह्वल, तब एक दिन यौ आफी खतम है जॉल। लेकिन अगर यौ परमेश्वरक तरफ बे ह्वल, तब यकै कभै नि मिटै पाला। इनर दगाड़ आपण व्यवहारल कै यस नि हो कि तुम परमेश्वरक दगाड़ लै लड़निवाँल नि बणि जाओ।"

तब उनुल वीक बात मानिबेर खाश शिष्यों कै भितेर बुलैबेर चाबुक लगूणक बाद उनुकै यौ हुकुम दे, कि आब तुम मैसों कै यीशुक नामल क्वे उपदेश नि दिया।

तब शिष्य सभाक बीच बे यैक लिजी खुशि हुनै गई, कि हम यीशुक लिजी बेईजत हुणक लैक निकयूं। और यैक बाद लै खाश शिष्य हरेक दिन परमेश्वरक भवन और घर-घरों मिं जैबेर मैसों कै यौ उपदेश दिंछी कि यीशु मसीहै हमर मुक्तिदाता छु।

## सात खाश सेवकोंक छटाव

(प्रेरितों ६:१-७)

यैक बाद लै विश्वासियोंकि गिनती बढ़नै गे। विश्वासियों मिं भौत यूनानी मैस लै छी, जो यहूदी मैसोंक दगाड़ यैक लिजी लड़न लागीं कि रोज खाँण बांटन बखत उनेरि विध्वाओंकि हयाव करी जां।

जब खाश शिष्योंल यौ बात सुणी, तब उनुल सब विश्वासियों कै बुलवैबेर कौ, "देखो, के हम खाँण खवूण पिवूणक कारणल परमेश्वरक उपदेश दिण छोड़ि दियूं? यैक लिजी तुम आपुं मिंबे सात यॉस मैसों कै छांटो, जो होशियार हो और जनर पास परमेश्वरक पवित्र आत्मा हो। खवूण-पिवूणक यौ काम कै उं देखॉल और तब हम प्रार्थना और परमेश्वरक उपदेश दिणक काम कै भली कै करि सकुन।"

यौ बात उं सबों कै भलि लागी और उं सात होशियार मैसों कै छांटिबेर खाश शिष्योंक सामण ल्याई। और उनुल उनर रूवार मिं हात धरिबेर प्रार्थना करी। वीक बाद इनुल आपण काम करण शुरू करौ।

और इसिक परमेश्वरक बचन फैलनै रौ, और भौत यहूदी याजकोंल लै यीशु मिं विश्वास करौ।

## स्तिफनुस महा-सभाक सामण

(प्रेरितों ६:८-१५)

यैक बाद स्तिफनुसल, जो उं सात मैसों मिं बे एक छी, परमेश्वरक अनुग्रह और सामर्थल भरिबेर मैसों कै भौत ठुला-ठुल चमतकराक काम करिबेर दिखाई। तब थ्वाड़ मैस स्तिफनुसक दगाड़ बहस करण लागीं, पर उं वीक दगाड़ नि जिति सक, किलैकि परमेश्वरक पवित्र आत्माल स्तिफनुस कै भौत बुद्धि दी राँखछी। तब उनुल दुसॉर मैसों कै धमकैबेर यैक लिजी तैय्यार करवा कि उं यौ बातक परचार करो कि स्तिफनुस, मोशेश और परमेश्वरक खिलाफ बात करणौ।

यौ सुणिबेर मैसों, पधानों और धर्म गुरुओं कै रीश ऐ, और उं सब स्तिफनुस कै पकड़िबेर महा-सभाक सामण ली गई। तब थ्वाड़ मैसोंल झुटि गवाहि दिबेर कौ, "यौ स्तिफनुस परमेश्वरक पवित्र भवन और मोशेशक नीमक विरोध बात करुं, और यस लै कूणौ कि यीशु यौ जाँग कै नांश करि द्यल और जो नीम मोशेशल हमुकै दी राँखीं, उनुकै बदेइ द्यल।"

जब सब मैसोंल स्तिफनुसक तरफ चा, तब उनुल वीक मूख स्वर्गदूतक जस चमकदार देखौ।

## स्तिफनुसक भाषण

(प्रेरितों ७:१-५३)

यौ सब सुणिबेर महायाजकल स्तिफनुस धै पुछौ, "के यौ बात सांचि छा?"

तब स्तिफनुसल कौ, "हे महाराँजो, सुणो! जब हमर कुल पितर इब्राहीम आपण जनम भूमी मेसोपोटामिया मिं छी, तब महान परमेश्वरल उकै आपण दर्शन दिबेर कौ, "तु आपण बिरादरी और यौ देश कै छोड़िबेर उ देश मिं जा, जो मी तुकै दिखूल।" तब उ वांक जाँग छोड़िबेर हारान देश मिं रुण लागौ। और यां वीक बोज्यूक मरणक बाद परमेश्वर उकै यौ देश मिं ल्याई, जां हम ऐल रूनुं। हालाकि उ बखत उ वां परदेशीक चारि रूँछी, फिर लै परमेश्वरल वीक दगाड़ यौ वैद करौ कि मी यौ पुर देश त्यर वंशजों कै द्यूल। उ बखत इब्राहीमक क्वे नॉनतिन नि छी। और परमेश्वरल उधै यौ लै कौ, कि त्यार वंशज एक तिसर देश मिं चार सौ साल तलक परदेशियोंक चारि रौल। और वांक मैस उनुकै आपण गुलाम बणैबेर भौत जादे दुःख द्याल। यैक बाद मी उ मैसों कै सजा द्यूल, और त्यार वंशज यां मेरि सेवा करौल।

फिर परमेश्वरल इब्राहीम धैं आपण सब मैसोंक खतना करणक लिजी कौ, जो यौ वैदक निशाण ह्वल। यैक बाद इब्राहीम बे इसहाक पैद हौ, और पैद हईयक अठूं दिन वीक खतना हौ। इसहाक बे याकूब, और याकूब बे हमार बार कुल पितर पैद हई।

यौं बारों मिंबे दस आपण भै यूसुफ कैं देखिबेर जलण लागीं। यैक लिजी उनुल उकैं मिस्र जाणिवॉलों कैं बेचि दे। पर परमेश्वरल यूसुफ कैं सब दुःख-तकलीफ बे बचैबेर मिस्रक उप-रॉज बणा। यैक बाद पुर मिस्र और कनान देश मिं भयंकर अकाव पड़ौ, यौ कारणल हमार पितरों कैं अनाज नि मिल। लेकिन जब याकूबल सुणौ कि मिस्र देश मिं अनाज छु, तब वील आपण च्यालों कैं मिस्र देश मिं भेजौ। यूसुफल उनुकैं पैली देखिबेर आपण बारि मिं नि बताय कि मी को छूं, लेकिन जब उं दुबार अनाज लिणक लिजी मिस्र मिं आई, तब वील उनुकैं बता कि मी तुमर भै यूसुफ छूं। यूसुफल आपण भैनों कैं भेजिबेर आपण बौज्यू और उनार नॉनतिनों कैं लै मिस्र मिं बुलवा। उनेरि गिनती उ बखत पचहत्तर छी। और उं सब मिस्र देश मिं ऐबेर यूसुफक दगाड़ रुण लागीं, और सब वैं मरि ग्याय। और उनर लाशों कैं लैबेर कनान देश मिं उ कबर मिं दफनाई गोय, जकैं इब्राहीमल मोल ली रॉखछी। लेकिन यैक बाद लै उनार वंशज मिस्र मिं भौत जादे बढ़ ग्याछी।

तब मिस्र मिं दुसर रॉज बणौ, जो यूसुफक बारि मिं के नि जाणछी। वील हमार पुरखोंक दगाड़ यस खराब बर्ताव करौ कि उनुकैं परेशान हबेर आपण पैद हई च्यालों कैं खेड़न पड़छी। यौ बखतै मोशेशक जनम हौ। उ देखीण चाणक भलौ छी, और तीन म्हैण तलक उ आपण घर मिं रौ। जब वीक इज उकैं और जादे दिनों तलक नि लुकै सकि, तब वील उकैं एक टुपर मिं धरिबेर गाड़ मिं धरि दे। तब मिस्री रॉजकि चेलि उकैं टिपिबेर आपण घर ली गे और आपण च्यलक चारि उकैं पावौ। और मोशेश कैं मिस्रियोंक पुर ज्ञान-विज्ञानक बारि मिं सिखाई गोय, और उ एक खाश आदिम बणि गोय।

जब मोशेश चालीस सालक छी, तब उ आपण इस्रायली भैनोंक दगाड़ भेट करणक लिजी गो। तब एक यहूदी मैसक दगाड़ अन्याय हुण देखिबेर वील अन्याय करणी मिस्री मैस कैं यैक लिजी मारि दे, कि यैल वीक जातिक भै समझि जॉल कि परमेश्वर यैकै जरियल हमुकैं छुड़ाल, पर उं नि समझ। जब दुसॉर दिन दुबार उनर बीच मिं ऐबेर वील द्वी यहूदियों कैं आपस मिं लड़न देखिबेर उनुकैं समझूण लगा कि तुम भै-भै हबेर एक-दुसर कैं किलै मारणाछा? तब उनुमिंबे एकल उधैं कौ, "तुकैं हमर न्याय करणी सैप कैल

ठैरा? के जसिक त्वील बेई उ मिस्री कैं मारौ, उसिकै तु आज मिकैं मारण चांछै?" यौ सुणिबेर मोशेश वांबे भाजिबेर मिध्यान देश मिं परदेशि हबेर रुण लागौ। और वां वीक द्वी च्याल हई।

जब मोशेश कैं वां चालीस साल है ग्याछी, तब परमेश्वरल आंगल जलणी बुजक बीच बे उकैं दर्शन दे। यौ देखिबेर मोशेश दंग रै गोय। जब उ वीक नजिक गो, तब परमेश्वरल उधैं कौ, "मी त्यार पुरखा इब्राहीम, इसहाक और याकूबक परमेश्वर छूं।" यौ सुणिबेर मोशेश डरिल काँमण लागौ और उकैं देखणकि हिम्मत नि आइ। परमेश्वरल कौ, "नजिक नि आ, पर आपण ज्वत ख्वल, किलैकि जो जाँग मिं तु ठाँड़ है रौछै, उ पवित्र जाँग छु। मील आपण मैसोंक जो मिस्र मिं छन, उनेरि दुःख-तकलीफ देखि रॉखी, और उनुधैं जबरन काम करूणियोंकि शिकैत लै सुणि है। उनुकैं छुडूणक लिजी मी स्वर्ग बे उतरिबेर यां ऐ रयूं। यैक लिजी मी तुकैं मिस्र देश भेजनु, तु वां जा।

परमेश्वरल उ मोशेश कैं जकैं इस्रायलियोंल यौ कैबेर ह्याव समझौ, कि तुकैं हमार न्याय करणी सैप कैल ठैरा, उकणी उनर छुणूणिवॉल ठैरा! और यैलै चमतकराक काम करिबेर उनुकैं मिस्र देश बे लाल समुदरक बाँट भ्यार निकलौ, और उ चालीस साल तलक रेगिस्तान मिं उनर नेता लै छी। यैक बाद यौ मोशेशलै इस्रायलियों धैं कौ, "परमेश्वर तुमुमिंबे म्यर जस एक नबी छाँटिबेर ठाँड़ करल।" <sup>4</sup> और मोशेशकै जरियल परमेश्वरल सिनै डॉन मिं हमार पुरखोंक दगाड़ बात करिबेर हमुकैं नीम लै देई।

लेकिन हमार पुरखोंल उं नीमों कैं छोड़िबेर मिस्र वापिस जाणक लिजी आपण मन बणा। जब मोशेश कैं डॉन मिं परमेश्वरक दगाड़ बात करन-करनै भौत दिन है ग्याछी, तब मैसोंल वीक भै हारून धैं कौ, "हमार लिजी यस द्यपत्तिक मूरती बणा, जो हमार अधिल-अधिल हिटो, किलैकि हम नि जाणन कि मोशेशक दगाड़ के हौ, जो हमुकैं मिस्र देश बे निकालिबेर यां ल्या।" तब उनुल एक सुनक बाँछ बणा, और वीक सामण भेट चढ़ैबेर आपण हातल बणाई उ बाछक मूरतिक लिजी त्यार मनूण लागी। यौ सब देखिबेर परमेश्वर नराज हौ, यैक लिजी उनुल उनुकैं दुसर द्याप्तोंक पुज करणक लिजी छोड़ि दे। जस भौत साल पैली परमेश्वरक सेवक आमोसल लिख रॉखछी,

"हे इस्रायलियो, जब तुम चालीस साल तलक रेगिस्तान मिं घुमणाछिया, के तुमुल मिकैं अन्न और जानवरोंकि भेट चढ़ैछा?"

<sup>4</sup> मोशेशक यौ बात यौ अनुवाद मिं शामिल न्हैतिन, लेकिन तुमुकैं बाइबिल मिं व्यवस्था-विवरण १८:१५ मिं मिलाल।

नि चढ़ाई, लेकिन तुम मोलेक और रिफाम द्याप्तोंक पुज करणाछिया, जनर मूरतियों कै तुमुल बणै रॉखछी। यैक लिजी ऑब मी तुमुकै बाबुल देश मिं लिजैबेर बसूल।”

जब हमार पितर रेगिस्तान मिं छी, तब उनर पास परमेश्वरक तम्बू लै छी, जकै मोशेशल परमेश्वरक हुकुमक अनुसार बणाछी। और जब हमार पुरखा यहोशूवक दगाड़ यौ देश मिं आई, और परमेश्वरल उनर लिजी यांक मैसों कै निकालि दे, तब लै परमेश्वरक तम्बू उनर दगाड़ छी। और यौ तम्बू यां दाउद रॉजक बखत तलक छी। दाउद मिं परमेश्वरक दया छी, यैक लिजी वील बिनती करी, कि मी परमेश्वरक लिजी एक भवन बणै सकू। जकै बाद मिं वीक च्यल सुलेमानल पुर करौ।

लेकिन परमेश्वर मैसक बणाई भवन भितेर नि रुन। जस धर्म शास्त्र मिं लिख रॉखौ, कि परमेश्वर यस कूं,

“स्वर्ग मेरि गद्दी, और धरति मेरि चौकि छु,

तुम म्यर लिजी कस घर बणाला, और के म्यर अराम करणक लिजी क्वे घर है सकछा?

के यौ सब दुनी मील आपण हातल नि बणाई?”

यौ सब कूणक बाद स्तिफनुसल यस लै कौ, "ओ निटूर मैसो, तुम परमेश्वरक बात कै अणसुणी किलै करछा! जस तुमार पुरखा करछी, तुम लै उनेरि चारि पवित्र आत्माक खिलाफ छा। तुमार पुरखोल परमेश्वरॉक सेवकों कै सतया, उनुल उनुकै लै मारि दे, जनुल मुक्तिदाताक यौ दुनी मिं उणकि भविष्यबाणी करी। उ मुक्तिदाता कै पकड़णी और उनर खूनी ऑब तुम बणि गयाछा! तुमुल परमेश्वरक नीम तो पा, लेकिन वीक पालन नि कर!"

## स्तिफनुसकि मौत

(पेरितो ७:५४-८:३)

यौ सब सुणिबेर वांक सब मैस स्तिफनुसक लिजी दांत पिसण और झुझलाण लागीं, लेकिन स्तिफनुसल पवित्र आत्मा मिं हबेर एकटक स्वर्गक तरफ चैबेर परमेश्वरकि महिमा देखी। और वील यीशु कै परमेश्वरक दैण तरफ ठाँड़ देखौ। तब वील कौ, "देखो, मी स्वर्ग कै खुली और मसीह कै परमेश्वरक दैण तरफ ठाँड़ देखणयूं!" पर उं आपण कान बन्द करिबेर एक दगाड़ स्तिफनुस मिं झपटीं। और उकै पकड़िबेर मारणक लिजी नगरक भ्यार

ली गई। और मारणिवॉल्लो आपण लम्ब कुर्तो कैं उतारिबेर पौलुस नामक जवानक पास धरि रॉखछी। यौ पौलुस लै इनर दगाड़ शामिल छी।

जब उं घंतरूणाछी, तब स्तिफनुसल प्रार्थना करी, "हे प्रभु यीशु, मेरि आत्मा कैं कबूल करिया!" यैक बाद वील आपण घुनोंक बल लफाईबेर जोर-जोरल कौ, "हे प्रभु, यौ पाप इनुमिं नि लगाया!" और यौ कैबेर उ मरि गोय। तब थ्वाड़ विश्वासियोंल स्तिफनुस कैं लिजैबेर दफना और वीक लिजी शोक करौ।

उदिन बे यरुशलेम मिं भयंकर अत्याचार शुरु हौ। और खाश शिष्यों कैं छोड़ उं सब यहूदिया और सामरियाक सब प्रदेशों मिं तितर-बितर है ग्याय। और यौ पौलुसल घर-घर जैबेर विश्वासियों कैं पकड़िबेर जेल भितेर खिति दे।

## शिमौन जादूगर

(प्रेरितों ८:४-२५)

तब जो विश्वासी तितर-बितर है राछी, उं घुमि-घुमिबेर भलि खबरक परचार करण लागीं। और फिलिप्पुस, जो सात सेवकों मिंबे एक छी, उ लै सामरियाक नगर मिं जैबेर यीशुक बारि मिं बतूण लागौ। जब मैसौल फिलिप्पुसक बातोंकें सुणौ और उं चमतकाराँक कामों कैं देखी जो फिलिप्पुसल दिखाई, तब उनुल एक मन हबेर वीक बातों मिं ध्यान दे। किलैकि भौत बिमार मैस ठिक हई और भौतों बे भूत लै निकलीं। इसिक यौ पुर नगर मिं खुशी ऐ गई।

यौ नगर मिं शिमौन नामक एक मैस रुंछी जैल आपण जादूल सामरियाक मैसों कैं दंग करि रॉखछी, और यौ दाव करछी कि मी एक महान मैस छूं। और नॉन बे ठुल सब वीक बात मानछी, और यौ लै कूछी, कि यौ मैस मिं ईश्वरक उ शक्ति छु जो सबों है ठुलि शक्ति कई जां। यौ जादूगरल मैसों कैं भौत पैली बे भरमै रॉखछी, यैक लिजी उं यैक बात मानछी।

लेकिन जब उं सब मैसौल फिलिप्पुसक बात सुणी, जो परमेश्वरक राज्यक और यीशु मसीक परचार करणौछी, तब भौत मैसौल वीक बात मिं भरौस करिबेर पाणिक-बपतिस्मा ले। शिमोनल लै भरौस करिबेर पाणिक-बपतिस्मा लिबेर लगातार फिलिप्पुसक दगाड़ रुण लागौ, और सब चमतकाराँक काम और चिन्ह देखिबेर दंग रै जाछी।



यैक बाद जब यरुशलेम मिं रुणी खाश शिष्योंल यौ सुणौ, कि सामरियोंल परमेश्वरक बचन कै मानि है, तब उनुल पतरस और यहूना कै उनर पास भेजौ। पतरस और यहूनाल सामरिया मिं ऐबेर यौ प्रार्थना करी, कि पवित्र आत्मा यौ मैसों मिं आओ। किलैकि ऐल तलक उनुमिं पवित्र आत्मा नि ऐ रैछी, केवल उनुल यीशु मसीक नामक पाणिक-बपतिस्मा ली रॉखछी। लेकिन जब पतरस और यहूनाल मैसों मिं हात धरौ, तब उनुकै पवित्र आत्मा मिली।

खाश शिष्योंक हात धरते ही पवित्र आत्मा मिलि जां, यौ देखिबेर शिमोन डबल लिबेर इनर पास आ। वील कौ, "मिकै लै यौ सामर्थ दियो, ताकी जनुमिं लै मी हात धरूं, उनुकै लै पवित्र आत्मा मिलि जाओ।" लेकिन पतरसल कौ, "तु और त्यार डबल नांश है जो! किलैकि त्वील परमेश्वरक बरदान कै डबलोल खरीदणक विचार करौ। यैक लिजी तु यैक भागिदार नि है सकनै, किलैकि परमेश्वरक लिजी त्यर मन साफ न्है। तु पश्चाताप करिबेर आपण यौ गलत कामक लिजी परमेश्वर धै माफि मांग! मी देखणयूं कि तु जलनल भरी रौछै और पापक बस मिं छै।" तब शिमोनल कौ, "तुम परमेश्वर धै म्यर लिजी प्रार्थना करिया, कि जो तुमुल कौ, उ मी मिं नि आओ।"

जब पतरस और यहूनाल मैसों कै परमेश्वरक बारि मिं बतै हैछी, तब उं यरुशलेम वापिस गई। और आपण सफरक दौरान उनुल सामरियाक भौत गौनों मिं भलि खबरक परचार करौ।

## ठुल सैप पाणिक-बपतिस्मा लिणौ

(पेरितों ८:२६-४०)

यैक बाद परमेश्वरक दूतल फिलिप्पुस धै कौ, "उठ, यरुशलेमक गाजा जाणी बाँटक दक्षिण दिशाक तरफ जा, जां रेगिस्तान छु।"

तब फिलिप्पुस दक्षिणक तरफ आ, उ बखत वां इथोपिया देशक एक अधिकारी, जो वांकि महारानीक ठुल सैप और खजांची छी, परमेश्वरक अराधना करणक लिजी यरुशलेम ऐ रौछी।<sup>5</sup> उ वापिस आपण देश जाणौछी, और रथ मिं भैबेर धर्म शास्त्र मिंबे यशायाह नबीक किताब पढ़णौछी। पवित्र आत्माल फिलिप्पुस धै कौ, "अघिल जैबेर रथक दगाड़-दगाड़ हिट।"

फिलिप्पुस दौड़बेर रथक पास गो, और सैप कै यशायाक किताब पढ़न सुणिबेर पुछौ, "के जो तुम पढ़णाछा, उकै समझणाछा?" वील कौ, "जब

<sup>5</sup> उ अधिकारी एक नपुंसक मैस छु।

तलक क्वे मिक्कै नि समझाल कि यैक मतलब के छु, तब तलक मी कसिक समझि सकनू?" और वील रथ रोकिबेर फिलिप्पुस कैं आपण दगाड़ बैठा। धर्म-शास्त्रक जो हिस्स उ पढ़णौछी उ मिं यस लिखी छी, कि

“उकैं एक काँटी जाणिवॉल भेड़क चारि ली जाई गो। और जस्सै भेड़ उण कतरणिवॉलक सामणी चुपचाप ठाँड़ रुं, उसिकै उ लै सुन्न छी। उकैं भौतै नीच करी गो और वीक दगाड़ न्याय नि करी गोइ। वीक वंशकी चरचा को करल? किलैकि वीक जिन्दगी धरति बे खतम करी जाणै।”

तब सैपल फिलिप्पुस धैं कौ, "किरपा करिबेर मिक्कै बताओ, यां कैक बारि मिं बात करी जाणै? यौ आपण बारि मिं बात करणौ या दुसरक बारि मिं?" तब फिलिप्पुसल उकैं समझा कि यशायाह नबील भविष्यबाणी करिबेर यौं बातों कैं यीशु मसीक बारि मिं कूणौछी। और वांबे लिबेर फिलिप्पुसल सैप कैं यीशुकि भलि खबर बतै।

सुणूण-सुणूणै जब उं एक पाणिक गाड़ लै पुजी, तब सैपल कौ, "यां पाणि छु। के मी ऐल पाणिक-बपतिस्मा ली ल्यूं?" फिलिप्पुसल जबाब दे, "अगर तुम आपण पुर मनल विश्वास करछा, तब तुम ली सकछा।" यौ सुणिबेर वील कौ, "मी पक्क विश्वास करनू कि यीशु परमेश्वरक च्यल छन।"

तब रथ कैं रोकिबेर सैप और फिलिप्पुस पाणि मिं गई। और फिलिप्पुसल सैप कैं पाणि मिं डुबैबेर निकालौ, और इसिक पाणिक-बपतिस्मा दे। जब उं पाणि बे भ्यार आई, तब परमेश्वरक आत्मा फिलिप्पुस कैं उठैबेर ली गो। सैपल उकैं फिर नि देख, लेकिन खुशि हुनै आपण बाँट न्है गोय। और फिलिप्पुसल आपुं कैं अशूदोद नामक जाँग मिं पा, और कैसरिया पुजण तलक सब नगरों मिं परचार करनै गो।

## पौलुस विश्वासी बणुं

(प्रेरितों ६:१-३०)


यौ बीच मिं पौलुस मिं यीशुक विश्वासियों कैं डरूण और मारणक भूत सवार छी। वील महायाजकक पास जैबेर उनुधैं यस लिखत मांगी, कि दमिश्क नगर मिं जो लै यीशुक विश्वासी हो, उनुकैं पकड़िबेर यरुशलेम मिं ल्याइ जाओ।

जब पौलुस यरुशलेम बे दमिश्क नगरक नजिक पुजौ, तब एकाएक अगाश बे एक उज्याव वीक चारों तरफ चमकौ। तब पौलुस भिं मिं छुटि

पड़ौ, और वील यौ अवाज सुणी, "पौलुस, पौलुस, तु मिकें किलै सतूणौछै?" तब पौलुसल कौ, "प्रभु, तुम को छा?" वील जबाब दे, "मी यीशु छूं, जकें तु सतूणौछै। आब उठिबेर नगर मिं जा, वां मी तुकें बतूल कि तुकें के करण छु।"

जो पौलुसक दगाड़ छी, यौ सब देखिबेर दंग रै ग्याय, किलैकि उनुल सिरफ अवाज सुणी और वां कैं के नि द्यख।

जब पौलुस भिं मि बे उठौ, तब उकें के नि देखीणौछी। यैक लिजी वीक दगाडु वीक हात पकड़िबेर नगर भितेर ली गई। यैक तीन दिन तलक वील के लै नि देखि सक और के खाय-पिय लै नै।



पौलुस कें यीशुक दर्शन

उ नगर मिं हनन्याह नामक एक विश्वासी छी, यकें परमेश्वरल दर्शन दिबेर कौ, "हनन्याह, उठ, सीधी नामक बाँट मिं यहूदाक घर जैबेर पौलुसक दगाड़ भेट करिये, किलैकि उ वां प्रार्थना करणौ, और वील आपण दर्शन मिं तुकें आपुं मिं हात धरण देखि रॉखौ, जैल उ दुबार फिर देखण लागि जॉल।"

पर हनन्याहल परमेश्वर धैं कौ, "प्रभु, मील भौत मैसों धैं यौ मैसक बारि मिं सुण रॉखौ, कि यैल यरुशलेम मिं तुमार मैसों कैं भौत दुःख दी रॉखी, और यां लै यैकै लिजी ऐ रौ!" लेकिन परमेश्वरल उधैं कौ, "तु जा, किलैकि मील उकें अन्य जातियों, रॉजों और इस्रायलियोंक सामण मिं लै म्यर नाम प्रकट करणी छांटि रॉखौ। और मी उकें बतूल कि म्यर लिजी उकें कतुक दुःख उठूण छु।"

तब हनन्याहल वां जैबेर पौलुस मिं हात धरिबेर कौ, "भै पौलुस, प्रभु यीशु मसीह जनुल तुकें बाँट मिं दर्शन दे, उनुलै मिकें लै यां भेजि रॉखौ, कि तु दुबार देखण लागो और पवित्र आत्माल लै भरी जाओ।" तब एकाएक पौलुसक आँख बे खुशयल जस निकलौ और वीक बाद उ दुबार देखण लागौ। और उभतै पौलुसल उठिबेर पाणिक्-बपतिस्मा ले।

यैक बाद पौलुसल खॉण खा, जैल उकें ताकत मिली। और थ्वाड़ दिनों तलक विश्वासियोंक दगाड़ दमिश्क मिं रौ। और जल्दी यहूदियोंक सभाघर मिं जैबेर यीशुक बारि मिं यौ परचार करण लागौ, कि उं परमेश्वरक च्यल

छन। तब सब मैस यौ देखिबेर दंग हबेर कूण लागी, "के यौ वी नहैंती, जो यरुशलेम मिं यीशुक विश्वासियों कैं चित्त मारछी? और यां लै यैकै लिजी ऐ रौ!" और पौलुसल दमिश्काँक यहूदियों कैं भौत जादे सबूत दिबेर समझा, कि यीशु परमेश्वरक वैद करी मुक्तिदाता छन, और उं पौलुसक बात कैं गलत साबित नि करि सक।

यैक भौत दिन बाद यहूदियोंल मिलिबेर पौलुस कैं मारणक मशौद करौ। यैक लिजी उ नगरक द्वारक सामणी दिन रात द्वाब लागिबेर बैठि रुंछी। लेकिन पौलुस कैं उनर मसौदक बारि मिं पत्त चल गोय, और दुसॉर विश्वासियोंल उकैं रात मिं टुपर मिं बैठेबेर नगरक दिवालक बाँट भ्यार पुजै दे।

यैक बाद पौलुसल यरुशलेम पुजिबेर विश्वासियोंक दगाड़ मिलणक कोशिश करी। लेकिन उं सब उकैं देखिबेर डरणाछी, और उनुकैं विश्वास नि हुणौछी कि उ लै उनरै चारि एक विश्वासी छु। लेकिन बरनबास नामक एक मैस उकैं आपण दगाड़ खाश शिष्योंक पास ली गो, और उनुकैं बता कि परमेश्वरल यकैं दर्शन दिबेर बात करी, और यैल भौत हिम्मतल दमिश्क मिं यीशुक परचार करौ। यैक बाद पौलुस इनर दगाड़ रुंछी, और निडर हबेर पुर यरुशलेम मिं यीशुक बातोंक परचार करण लागौ। और पौलुस यूनानी बुलाणी यहूदियोंक दगाड़ लै बात-चीत और बहस करनै रुंछी, लेकिन उं यकैं चित्त मारण चांछी। जब विश्वासियों कैं यौ बातक पत्त चलौ, तब उनुल पौलुस कैं कैसरिया नामक बन्दरगाह बे तरसुस नगर ली गई।

## पतरस मरी स्यैणि कैं ज्यून करणौ

(प्रेरितों १:३१-४३)

यैक बाद अत्याचार कम हई, और यहूदिया, गलील और सामरियाक प्रदेश मिं विश्वासियों कैं शांति मिली, और प्रभुक डर मिं चलनै और पवित्र आत्माक सहारल बढ़नै गई।

पतरस सब जाँगों मिं घुमन-घुमनै लुद्दा नगराँक विश्वासियोंक पास पुजौ। वां उकैं एक बाइ पड़ी मैस मिलौ, जैक नाम एनियास छी। और उ आठ साल बे बिमार छी। जब परतसल उधैं कौ, "एनियास, यीशु मसीह तुकैं भल करणई। उठ, आपण सजि उठा!" तब उ झट्ट ठाँड़ उठौ। यौ देखिबेर वांक भौत मैस यीशु मिं भरोस करण लागीं।

वांक नजिक याफा नगर मिं तबिता नामकि एक विश्वासी रुंछी, जो दीन-धर्मक कामों मिं लागि रुंछी। पर यौं दिनों उ बिमार हबेर मरि पड़ी। और स्यैणियोल उकै नवै-धवैबेर घरक मेलिवाँल कोठरि मिं पड़ै दे।

जब विश्वासियोल यौ सुणौ कि पतरस लुद्दा मिं छु, तब उनुल एकदम द्वी मैसों कैं उकैं यां बुलूणक लिजी भेजौ। यौ सुणिबेर जब पतरस याफा पुजौ, तब मैस उकैं उ कोठरि मिं ली गई, जां मरी तबिता कैं धरि राँखछी। वां सब विधाव स्यैणी पतरसक चारों तरफ ठाँड़ हबेर डाड़ मारनै, और उकैं उ लुकुड़ों कैं दिखूण लागीं, जनुकैं तबिताल उनर लिजी बनाछी।

तब पतरसल सबों कैं भ्यार करणक बाद घुन टेकिबेर प्रार्थना करी, और लाशक तरफ चैबेर कौ, "तबिता, उठ!" और उ आँख खोलिबेर बैठि गई।

तब पतरसल आपण हातल सहार दिबेर उकैं ठाँड़ करौ और विश्वासियों और विध्वाओं कैं बुलैबेर उनुकैं दिखा कि तबिता ज्यून और बिल्कुल ठिक-ठाक छु। यौ बात सॉर याफा मिं फैल गई और वांक भौत मैसोंल प्रभु मिं विश्वास करौ। और पतरस भौत दिनों तलक वां शिमौन नामक एक चमड़क काम करणी मैसक घर मिं रौ।


## भलि खबर अन्य जातियोंक लिजी लै छु

(पेरितों १०)

### रोमी सुबदार कैं स्वर्गदूतक दर्शन

कैसरिया नगर मिं कुरनेलियुस नामक एक रोमी सुबदार छी। उ और वीक परिवार धार्मिक और परमेश्वरक भक्त छी, यैक अलावा उ यहूदी गरीब मैसों कैं दान दिंछी और हर बखत प्रार्थना मिं लागि रुंछी। एक दिन दोफरिक बाद परमेश्वरक दूतल कुरनेलियुस कैं दर्शन दिबेर कौ, "कुरनेलियुस!" तब वील कौ, "प्रभु, के बात छु?" फिर स्वर्गदूतल कौ, "परमेश्वरल तेरि प्रार्थना सुणी, और त्यर दान दिणल उं खुशि छन। यैक लिजी आँब तु याफा नगर मिं मैस भेजिबेर शिमोन जकैं पतरस लै कूनी, उकैं बुलवै ले। उ चमड़क काम करणी शिमोनक घर मिं रुकि रौ, जो समुद्रक किनार मिं छु।"

यैक बाद उ स्वर्गदूत वांबे न्है गोय, और कुरनेलियुसल द्वी दासों और एक धार्मिक सिपै कैं बुलवा। और उनुकैं सब बात भली कैं बतैबेर याफा नगर भेजौ।



पतरस दर्शन देखणौ

## पतरसक दर्शन

जब उं दुसॉर दिन याफा नगरक नजिक पुर्जी, उ बखत पतरस आपण घरक पॉख मिं प्रार्थना करणक लिजी गो। जब दोफरिक बखत उकें भूक लागी और खॉण पाकणौछी, उ बखत वील यौ दर्शन देखौ कि वील एक चधरक चारि क्वे लुकुड़ चारों क्वाड़ों बे लटकी धरति मिं उण देखौ, जमिं सब किसमाँक चौपा, चाड़-प्वथील और सब रिडणी अशुद्ध जीव-जन्तु छी। तब वील यौ अवाज सुणी, "पतरस, उठ और इनुकें मारिबेर खा।"

लेकिन पतरसल कौ, "प्रभु, ना, मी यस नि करि सकन, किलैकि

मील कभै क्वे अशुद्ध चीज नि खै राखि!" फिर वील यौ अवाज सुणी, "जकें परमेश्वरल शुद्ध ठैरै राँखौ, उकें तु अशुद्ध नि कौ।" तीन बार यस्सै हुणक बाद, उ चधर दुबार अगाश मिं न्है गोय।

यैक बाद जब उ यौ दर्शनक बारि मिं सोचणौछी कि यैक मतलब के हवल, तब कुरनेलियुसॉक भेजी मैस शिमोनक घरक पत्त-पाणि लगैबेर द्वारक सामण ठाँड़ हबेर पुछण लागीं, "शिमोन, जकें पतरस कूनी, के उ यै रंछा?" तब पवित्र आत्माल पतरस थैं कौ, "देख, तीन मैस तुकें पुछणई। आँब झट्ट उठ और तेलि जैबेर बेहिचक उनर दगाड़ जा, किलैकि मीलै उनुकें भेजि राँखौ।"

तब वील तलि जैबेर उनुथैं कौ, "देखो, जकें तुम पुछणाछा, उ मी छूं, तुम यां किलै ऐ राछा?" तब उनुल कौ, "कुरनेलियुस सुबदार, जो धर्मी छु और परमेश्वर देखि डरूं, और जैक पुर यहूदी जातिक मैस इज्जत करनी, उकें एक पवित्र स्वर्गदूतल यौ हुकुम दी राँखौ कि उ तुमुकें आपण घर बुलैबेर बचन सुणो।" यौ सुणिबेर पतरसल उनुकें भितेर बुला, और उदिन उं वै रई। तब दुसॉर दिन पतरस और याफाक थ्वाड़ विश्वासी लै उनर दगाड़ बाँट लागीं, और तिसॉर दिन उं सब कुरनेलियुसक पास पुर्जी।

## कुरनेलियुसक घर मिं

कुरनेलियुस आपण पुर परिवार और खाश दगडुवोंक दगाड़ उनर इंतजार करणौछी। जब कुरनेलियुसल सुणौ कि पतरस पुजि गो, तब वील जैबेर पतरसक दगाड़ भेट करी, और उकें चौड़ हबेर पैलाग करौ। लेकिन पतरसल उकें उठैबेर कौ, "मी लै तुमरै चारि मैस छूं!" तब पतरस वीक दगाड़ बात-चीत करनै भितेर गो, और वां भौत मैसों कें जॉम देखिबेर कूण लागौ, "तुम लै जाणछा कि यहूदियोंक लिजी क्वे अन्य जातिक दगाड़ रिशत धरण या उनर घर मिं जाण मना छु, लेकिन परमेश्वरल मिक्कें बता कि मी क्वे मैस कें अशुद्ध नि कूं। यैक लिजी जब तुमुल मिक्कें बुलवा, तब मी बेहिचक आयूं। आब बताओ, तुमुल मिक्कें यां किलै बुलवा?"

तब कुरनेलियुसल कौ, "आज बे चार दिन पैली यौ बखतै, जब मी प्रार्थना करणौछी, तब एक चमकिल लुकुड़ पैरी मैस म्यर सामण आ, और वील मिधें कौ, "परमेश्वरल तेरि प्रार्थना सुणी, और त्यर दान दिणल उं खुशि छन। यैक लिजी कैकणी याफा नगर भेजिबेर शिमोन जकें पतरस लै कूनी, उकें यां बुलवै ले। उ समुद्रक किनार चमड़क काम करणी शिमोनक घर मिं रुकि रौ।" यैक बाद मील तुमुकें यां बुलवा और तुमुल यां ऐबेर बड़ि किरपा करी। आब हम सब यां परमेश्वरक सामण यैक लिजी छूं कि जो बात उनुल तुमुकें बतै रॉखी, हम सब लै वीक बारि मिं जाण सकौ।"

## पतरसक परचार

तब पतरसल कौ, "आब मेरि समझ मिं भली कै ऐ गो कि परमेश्वर कैकै दगाड़ भेद-भाव नि करन, लेकिन हरेक जातिक मैस जो परमेश्वर देखि डरनी और धार्मिक काम करनी, परमेश्वर उनुकें भल मानुं।

तुमुकें यौ बात मालुम छु, कि परमेश्वरल यहूदियोंक पास यीशु मसीक जरियल जो सबोंक प्रभु छन, शांतिक समाचार सुणवा। तुमुल यहूनाक पाणिक-बपतिस्माक बारि मिं लै सुण हवल, और मालुम लै छु कि परमेश्वरल नासरत गौक यीशु कें पवित्र आत्मा और सामर्थक दान लै दे। उं भलाइक काम करनी और उ सबों कें जो शैतानक जरियल परेशान छी, भल करनै रुंछी, किलैकि परमेश्वर उनर दगाड़ छी। हम उं सब बातोंक गवाह छूं, जो यीशुल यहूदिया और यरुशलेम मिं करी, और यौ यीशु कें मैसोंल सूली मिं चढैबेर मारि दे। लेकिन परमेश्वरल उनुकें तिसार दिन मरियों मिंबे ज्यून करिबेर उं मैसों कें दिखा जनुकें परमेश्वरल पैलियै बे छांति रॉखछी। यैक

हम गवाह छूँ, और मरियों मिबे ज्यून हुणक बाद हमुल उनर दगाड़ खा-पी। और उनुल हमुकै यौ हुकुम लै दे, कि हम मैसों कै उनर बारि मिं बतूँ और उनर गवाही द्यूँ कि परमेश्वरल उनुकै ज्यूनोँ और मरियोंक न्याय करणी ठैरै रॉखौ। उनरै बारि मिं सब नबियोंल गवाही लै दे कि जो लै उनुमिं भरौस धरौल, उनुकै उनर जरियल पापोंक माफि मिलेलि।"

जब पतरस बुलाणै मिं छी, तब पवित्र आत्मा सब सुणणिवॉलों मिं ऐ। और उं अलग-अलग बोलि मिं बुलाण और परमेश्वरक अराधना करण लागीं। जो यहूदी विश्वासी पतरसक दगाड़ ऐ राछी, उं यौ सब देखिबेर दंग रै ग्याय कि पवित्र-आत्माक बरदान अन्य जातियों कै लै मिलणौ।

तब पतरसल कौ, "यौँ मैसों कै लै हमर चारि पवित्र-आत्मा मिलि रै, तब आँब क्वे इनुकै पाणिक-बपतिस्मा दिणक लिजी मना करि सकछा?" यैक बाद पतरसल उनुधैँ पाणिक-बपतिस्मा लिणक लिजी कौ, और उनुल पतरस धैँ गुजारिश करी कि उ थ्वाड़ दिनों तलक उनर दगाड़ रवो, और वील उस्सै करौ।

## अन्य जातियोंक बारि मिं चर्चा

(पेरितों ११:१-१८)

यैक बाद खाश शिष्यों और दुसॉर यहूदी विश्वासियों कै यौ बातक पत्त चलौ कि अन्य जातियोंक मैस लै आँब यीशु मिं भरौस करण भै ग्याय। जब पतरस उनर पास यरुशलेम मिं आ, तब थ्वाड़ यहूदी विश्वासियोंल वीक काट करिबेर कौ, "तुमुल उनर घर मिं जैबेर खॉण किलै खा, जो यहूदी न्हैतिन?"

यौ सुणिबेर पतरसल उनुकै एक-एक बात समझैबेर बतै, जब मी याफा नगर मिं प्रार्थना करणौछी, उ बखत मील यौ दर्शन देखौ कि एक ठुली चधरक चारि क्वे चीज चारों कुचों बे लटकी अगाश बे तेलि उणै। और उ ठिक म्यर सामण ऐ। और जब मील उकै भली कै देखौ, उमिं धरतिक सब किसमॉक चौपा, चाड़-प्वथील और सब रिडणी अशुद्ध जीव-जन्तु छी। और फिर मील यौ अवाज सुणी, "पतरस, उठ, इनुकै मारिबेर खा।" लेकिन मील कौ, "प्रभु, मील कभै क्वे अशुद्ध चीज नि खै राखि।" तब दुसर बार स्वर्ग बे यौ अवाज ऐ, "परमेश्वरल जकै शुद्ध बणै रॉखौ, तुम उकै अशुद्ध नि कवो।" तीन बार यस्सै हौ, यैक बाद सब स्वर्ग हुं न्है गोय। और उ बखतै म्यर पास



कैसरिया बे भेजी तीन मैस आई। तब पवित्र आत्माल मिधैं कौ, "बे हिचक इनर दगाड़ जा।" फिर यौं छै विश्वासी भै लै म्यर दगाड़ आई, और हम उ मैसक घर भितेर गोयूं। तब वील हमुकैं बता, कि वील स्वर्गदूत कैं आपण घर मिं देखौ, जैल उधैं कौ, "तु कैकणी याफा नगर भेजिबेर शिमोन जकैं पतरस लै कूनी यां बुलवा। उ तुकैं यांस बातों कैं बताल, जैल तु और त्यर पुर परिवार मुक्ति पॉल।" जब मी उनुकैं यीशुक बारि मिं बतूणौछी, तब पवित्र आत्मा उनुमिं ऐ, जसिक पैली हमुमिं ऐछी। तब मिकैं उ बचन याद आई जो यीशुल हमुधैं कई, कि यहूनाल तो पाणिक-बपतिस्मा दे, पर तुम पवित्र आत्माक बपतिस्मा पाला। जब परमेश्वरल उनुकैं वी बरदान देई, जो हमुकैं लै मिली, तब मी को छूं जो परमेश्वरक खिलाफ जानू? जब परमेश्वरल उनर दगाड़ क्वे भेदभाव नि कर, तब मी किलै करनू?"

यौं सब बातों कैं सुणिबेर यहूदी विश्वासी शांत है ग्याय। और उनुल यौ कैबेर परमेश्वरक महिमा करी, "परमेश्वरल अन्य जातियों कैं लै यौ बरदान दी रॉखी कि उं लै आपण मनो कैं बदेइबेर अनंत जीवन पै सको!"

## अंताकियाक नई विश्वासी

(प्रेरितों ११:१६-३०)

यैक बाद जो मैस अत्याचारोंक कारणल तितर-बितर है ग्याछी, उं फीनीके प्रदेश, कुप्रुस द्वीप और अंताकिया तलक पुजि ग्याय। और वां उं दुसॉर यहूदियों मिं यीशुक भलि खबरक परचार करछी।<sup>6</sup> और थ्वाड़ अन्य देशों मिं रुणी विश्वासी लै अंताकिया पुजीं। उनुल अन्य जातियों कैं लै प्रभु यीशुक बारि मिं बतूण लागीं। किलैकि प्रभु उनर दगाड़ छी, यैक लिजी भौत मैस विश्वास करिबेर परमेश्वरक तरफ आई।

जब उनर बारि मिं यरुशलेमक विश्वासियोंक समुदायल सुणौ, तब उनुल बरनबास कैं अंताकिया भेजौ। वां पुजिबेर बरनबासल यौ देखिबेर कि परमेश्वरल वांक मैसों कैं लै दया करिबेर उनुकैं विश्वास करण देखी, उ खुशि है गोय। और वील उनर हिम्मत बढूणक लिजी उनुधैं कौ, "तुम पुर मनल परमेश्वर मिं भरौस करणक लिजी अटल रया।"

बरनबास एक भल विश्वासी और पवित्र आत्माल भरी मैस छी, जैल वीक असरल भौत मैस परमेश्वर मिं भरौस करिबेर बढीं।

<sup>6</sup> अंताकिया और फिनीकी इस्त्रायल बे उत्तर दिशाक तरफ छी, जो आजकल सीरिया और लैबनान कहलाई जानी। और कुप्रुसक नाम साइप्रस है गो।

यैक बाद बरनबास पौलुस कै चाणक लिजी तरसुस गो। वांबे उकें आपण दगाड़ अंताकिया लिबेर आ, और उं द्विवै अंताकिया मिं एक साल तलक मैसों कै सिखूनै रई। यौ बखत बे सबों है पैली अंताकिया मिं यीशुक विश्वासियों कै "मसीही" कई गो।

उ बखतै थ्वाड़ नबी यरुशलेम बे अंताकिया आई। उनुमिं बे एक जैक नाम अगबुस छी, पवित्र आत्मा मिं हबेर कूण लागौ कि पुर धरति मिं अकाल पड़णी छु। (और सांचि मिं यौ अकाल सम्राट क्लौदियुसक बखत मिं पड़ौ।) तब विश्वासियोंल फैसाल करौ, कि यहूदा प्रदेश मिं रुणी विश्वासी भै-बैणियोंक मधत करणक लिजी हम डबल जॉम करिबेर भेजुल। जस उनुल कै रॉखछी, उस्सै उनुल बरनबास और पौलुसक हात विश्वासियोंक प्रधानोंक लिजी दान भेजौ।

## पतरसकि सजा और अजादी

(प्रेरितों १२:१-२४)

उ बखतै हैरोदेस रॉजल विश्वासी समुदायक थ्वाड़ मैसों कै सत्यून शुरु करौ। वील खाश शिष्यों मिंबे यहूनाक भै याकूब कै तलवारल कटवै दे, और जब वील देखौ कि यहूदी यौ देखिबेर खुशि हुणई, तब उ पतरस कै लै पकड़णक लिजी गो। पतरस कै पकड़िबेर जेल मिं खिति दे। और वील उकें चार-चार सिपैनोंक चार टुकड़ियोंक देख-रेख मिं धरि रॉखछी। ऐल बिन खमीरी र्वटोंक त्यार छी, यैक लिजी रॉजल पतरसक न्याय ऐल नि कर, लेकिन उ त्यारक बाद वीक न्याय पुर जनताक सामण करणिवॉल छी।

जब पतरस जेल मिं छी, तब दुसर विश्वासी मैस उकें बचूणक लिजी परमेश्वर धैं प्रार्थना करणाछी। और जदिन हैरोदेस पतरस कै मैसोंक सामण ल्युणी छी, वीक पैल ब्याव पतरस जंजीरोंल बादी, द्वी सिपैनोंक बीच मिं पड़ि रौछी और द्वार लै पौहरदार छी। तब एकाएक परमेश्वरक दूत वां आ, और उ कोठरि मिं उज्याव है गोय। फिर दूतल पतरस कै उठैबेर उधैं कौ, "जल्दी उठ!" और जस्सै पतरस ठाँड़ उठौ, उस्सै वीक हातोंक जंजीर खुलिबेर भिं मिं छुटि ग्याय। और दूतल पतरस धैं कौ, "आपण कमर बादिबेर ज्वात पैर और कुर्त लगैबेर म्यर पछिल आ।" तब पतरसल यस्सै करौ। जब पतरस वीक पछिल-पछिल जाणौछी, तब वीक समझ मिं के नि उणौछी कि

यौ सब हकीकत छु या स्वीण। जब उं पैली एक और फिर दुसर पौहरदारोंक बाँट तिसर लुवक द्वार लै पुर्जी, जो कि नगरक तरफ जांछी, तब उ द्वार लै उनर लिजी आफी खुलि गोय। और जब उं यौ बाँट मिं पुर्जी, तब स्वर्गदूत पतरसक दगाड़ बे गैब है गोय। तब पतरसल कौ, "आँब मिक्कें यकीन है गो कि परमेश्वरल आपण दूत भेजिबेर मिक्कें हैरोदेसक हात बे बचैबेर यहूदियोंक मंशा फेल करि है!"

तब पतरस यहूनाक घर गो, जकें मरकुस लै कूनी। वां भौत विश्वासी जॉम हबेर प्रार्थना करणाछी। जब पतरसल द्वार खट-खटा, तब रूदे नामकि दासी ऐ, कि को छु? और पतरसक अवाज कैं पछयाणिबेर खुशि हुनै बिन द्वार खोलिये भितेर गे, और सबों कैं बतूण लागी कि पतरस द्वार लै ठाँड़ छु! यौ सुणिबेर उनुल उधैं कौ, "तु पागल है गेछै।" पर वील और लै जोर दिबेर कौ, "मी सांचि कूणयूं, उ पतरसै छु।" पर उनुल वीक बात मिं भरौस नि करिबेर उधैं कौ, "उ पतरसक स्योव ह्वल।" यौ बीच जब पतरस द्वार खड़खड़ाते रौ, तब उनुल द्वार खल्लौ और पतरस कैं देखिबेर दंग रै ग्याय। लेकिन पतरसल इशॉर करिबेर उनुकें चुप करा और बता कि परमेश्वरल उकें जेल बे कसिक भ्यार निकालौ। फिर वील कौ, "तुम दुसॉर भैनों कैं खबर भेजि दिया कि मी जेल बे भ्यार ऐ गोयूं।" यैक बाद पतरस वांबे दुसर जाँग हुं न्है गोय।

राति जब सिपैनोंल पतरस कैं जेल मिं नि पाय, तब उनुमिं हड़-बड़ाहट मचि गई कि पतरसक दगाड़ के हौ कैबेर! तब हैरोदेसल पतरस कैं सब जाँग मिं ढुनवा, और जब उ नि मिल तब वील आपण सिपैनों कैं धमकैबेर पतरसक बारि मिं फिर पुछौ। जब उनुल के जवाब नि दी सक, तब वील यौ सिपैनों कैं मरवै दे।

यैक बाद हैरोदेस थ्वाड़ बखतक लिजी यहूदिया बे जैबेर कैसरिया मिं रुण लागौ। थ्वाड़ बखतक बाद उ बटी-बाटिबेर आपण रॉज-गद्दी मिं भैबेर भाषण दिण लागौ। वीक बातों कैं सुणिबेर वांक मैस जोर-जोरल कूण लागीं, "यौ क्वे मैसक न, पर ईश्वरक अवाज छु!" और एकाएक परमेश्वरक दूतल हैरोदेस कैं मॉर दे, किलैकि वील परमेश्वरक महिमा नि करि। वीक आड मिं किड़ पड़ि ग्याय, और वील दम तोड़ दे।

लेकिन परमेश्वरक बचन फैलनै गो।

## पौलुस और बरनबास कै परचारक लिजी भेजण

(प्रेरितों १३:१-१२)

जब पौलुस और बरनबासल यरुशलेम मिं विश्वासियों कै अंताकियाक मैसोंक भेजी भेट दी हैछी, तब उं अंताकिया लौट आई। और उं आपण दगाड़ मरकुस नामक जवान कै लै लिबेर आई।

अंताकियाक विश्वासियोंक समूह मिं थ्वाड़ नबी और मैसों कै सिखूणिवॉल लै छी। एक दिन जब इनुल बरनबास और पौलुसक दगाड़ बर्त धरिबेर प्रभु परमेश्वरक अराधना करणाछी, उ बखत प्रभु परमेश्वरक आत्माक उनुकै बता, "मी बरनबास और पौलुस कै एक खाश कामक लिजी बुलूणयूं, यैक लिजी तुम उनुकै यांबे ठैरैबेर भेजिया।" यौ सुणिबेर उनुल पौलुस और बरनबास द्विनोक र्वर मिं हात धरिबेर उनर लिजी प्रार्थना करिबेर उनुकै भेजौ। इसिक परमेश्वरक आत्माक जरियल बुलाई बरनबास और पौलुस पाणिक जहाजल कुप्रुस द्वीपक तरफ गई। और मरकुस लै उनर दगाड़ गो।

कुप्रुस मिं सलमिस नामक जाँग मिं पुजिबेर यहूदी मैसोंक सभा-घरों मिं जैबेर परमेश्वरक बचन मैसों कै बतूण लागीं। यौ द्वीप मिं सब जाँग जाणक बाद उं पाफुस आई, वां उनेरि भेट बर-येशु नामक एक यहूदी जादूगरक दगाड़ है, जो वांक राजपालक दगाड़ रुंछी। राजपाल एक भल आदिम छी, और उ बरनबास और पौलुस कै बुलैबेर परमेश्वरक बचन सुणण चांछी। लेकिन बर-येशु उनर खिलाफ छी, और उ राजपाल कै परमेश्वर मिं भरौस करण बे लै रोकण चांछी। तब परमेश्वरक आत्मा पौलुस मिं ऐ, और उनुल उकै चैबेर कौ, "तु शैतानक औलाद छै, तु बेईमान और ध्वकबाज छै, और हरेक भल बातोंक दुश्मण लै छै! के तु परमेश्वरक भलि बातों कै गलत बतूण बे नि सुधरलै? आब प्रभु तुकै सजा द्याल। तु काँण है जालै और थ्वाड़ बखत तलक तु सूरजक उज्याव लै नि देखि सकलै!" और उभतै वीक आँखोंक सामण अन्यार है गोय और उ फिर लाचार हबेर इथकै-उथकै टटोल-टाटोल करण लागौ कि क्वे वीक हात पकड़िबेर उकै ली जै दियो।

यौ घटना कै देखिबेर राजपालल भरौस करौ, किलैकि उ परमेश्वरक बचन सुणिबेर दंग रै गोय।

## पौलुस और बरनबास प्रिसिदिया प्रदेश मिं

(प्रेरितों १३:१३-४३)

यैक बाद पौलुस और वीक दगडु नावल पाफुस बे पेरगे नामक नगर मिं पुर्जी। वांबे मरकुस उनुकें छोड़िबेर यरुशलेम लौट गोय। पौलुस और बरनबास वांबे अधिल प्रिसिदिया प्रदेशक अंताकिया नगर मिं गेई, और ऐरामक दिन यहूदियोंक सभा-घर मिं जैबेर भै गयाय।<sup>7</sup> और धर्म-शास्त्र पढ़ी जाणक बाद अधिकारियोंल वांक मैसोंक जोश बढूणक लिजी उनुधें कौ कि आँब तुम के कवो। यैक लिजी पौलुसल उठिबेर मैसों कें चुप रुणक इशॉर करिबेर कौ, "इस्त्रायली भाइयो और परमेश्वर कें मानणी दुसॉर मैसो, सुणो! तुम सब जाणछा कि परमेश्वरल हमर लिजी के-के करौ। उनुल हमार पुरखों कें दुसॉर मैसों बे अलग करिबेर उनर दगाड़ एक वैद करौ। हमार पुरखा मिस्र देश मिं गुलाम बणी, लेकिन परमेश्वरल उनुकें वांबे चार सौ पचास सालक बाद छुड़ैबेर कनान देश मिं पुज्या। उ बखत तलक हमर मैसोंल एक भौत ठुल दल बणौ। और परमेश्वरल कनान देश मिं उनर लिजी सात जातिक मैसों कें नांश करिबेर उ देश हमर पुरखोंक कब्ज मिं दी दे। परमेश्वरल उनर लिजी अलग अलग नेता ठैराई। जब शमूएल नबी और नेता लै छी, तब मैसोंल आपण लिजी एक रॉजक मांग करी। और परमेश्वरल बिन्यामीनक खानदानक शाउल कें उनर रॉज बणा। वील चालीस साल तलक रॉज करौ। लेकिन वील परमेश्वरक बात नि मानि और उनुल वीक बदाव मिं दाउद कें रॉज बणा। और परमेश्वर दाउद कें देखिबेर भौत खुशि छी, कि दाउद उनेरि बात मानि छी। और उनुल यैक खानदान मिं प्रभु यीशु कें पैद करौ, जो हमर मुक्तिदाता छन।

यीशुक काम शुरु हुण है पैली यहूना पाणिक बपतिस्मा दिणिवाँलल सब इस्त्रायली मैसों कें मन फिराव और पाणिक बपतिस्मा लिणक लिजी कौ। और वील यस लै कौ, "तुम मिंकेँ जो समझणाछा मी उ न्हँतियूं। मी मुक्तिदाता न्हँतियूं। लेकिन सुणो! उं म्यर बाद उणी छन, और मी तो उनर ज्वतक तांडु लै खोलणक लैक न्हँतियूं।" और भाइयो, इब्राहीमक संतानो और परमेश्वरक भक्तो, मुक्तिक यौ खबर हम सबनक लिजी भेजी गे। यरुशलेमाँक मैसोंल और उनार नेताओंल यीशु कें नि अपणाय। और उनुकें मौतकि भयंकर सजा दिलैबेर अनजान मिं उं सब भविष्यबाणियों कें पुर करौ

<sup>7</sup> यौ सब नगर आजक तुर्की देश मिं छन।

जो हर हफ्त मिं सभाघर मिं धर्म-शास्त्र मिं बे पढ़ी जानी! मैसौल राजपालक सामण यीशुकि क्वे लै गलित साबित नि करि सक, फिर लै उनुल उधैं यीशु कैं मौतक सजा दिणक लिजी जोर करौ। और उनुल जस मुक्तिदाताक बारि मिं धर्म-शास्त्र मिं लेखि छु, उ सब पुर करिबेर वीक लाश कैं दफना। लेकिन परमेश्वरल तिसॉर दिन उनुकैं मरियों मिं बे फिर ज्यून करौ! यैक बाद उनुल भौत मैसों कैं आपण दर्शन देई, जो उनर दगाड़ गलील बे यरुशलेम ऐ राछी। और ऑब यौ मैस औरोंक लिजी गवाह छन। ऑब हम यौ भलि खबर तुमुकैं लै सुणूं कि परमेश्वरल हमर पुरखोंक दगाड़ जो वैद करि रॉखछी, उ पुर करि है!

भाइयो, तुम यौ बात भली कै समझि लियो कि तुमार पाप माफ मोशोशक नीमौल नै, पर केवल प्रभु यीशु मसीक जरियल है सकनी। सचेत रओ कि तुम यॉस मैस नि बणो जनर बारि मिं नबियोंल यौ बात कैछी, कि

हंसि करणिवाँलो, देखो, दंग हबेर मरि जाओ!

मी आजकल उ काम करणी छूं,

जैक बारि मिं अगर क्वे तुमुकैं बताल,

तब तुम भरौस नि करला।"

यैक बाद जब पौलुस और बरनबास सभा-घर बे भ्यार उणाछी, तब मैसौल उनुधैं बिनती करी कि तुम यौं बातों कैं अधिलक ऐरामक दिन लै बताया। और उ दिन सभा-घर बे छुटणक बाद भौत मैस उनर दगाड़ ऐ गयाय। फिर पौलुस और बरनबासल उं मैसों धैं कौ कि तुम यीशु मिं भरौस करण मिं बढ़नै रओ।

## अधिल हफ्त

(प्रेरितों १३:४४-५२)

अधिल ऐरामक दिन सभा-घर मिं पौलुस और बरनबासकि बात सुणणक लिजी भौतै भीड़ जॉम है। इदुक जादे भीड़ देखिबेर यहूदी नेता पौलुस और बरनबास देखि रीश करण लागी, और पौलुसक बेईजती करनै मैसों मिं वीक काट लै करण लागीं। तब पौलुस और बरनबासल निडर हबेर उनुधैं कौ, "जरूवत यौ छी कि पैली परमेश्वरक बचन तुमुकैं सुणाई जाँन, किलैकि तुम परमेश्वरक मैस छा, लेकिन तुम यौ नि चांना और आपुं कैं स्वर्गक

लिजी तैय्यार नि करना। यैक लिजी आँब हम तुमर बदाव दुसॉर मैसों कें यौ बतूणयं। किलैकि प्रभु परमेश्वरल हमुकें धर्म-शास्त्र मिं यौ हुकुम दी राँखौ,  
 “मील तुमुकें दुसॉर जातियोंक मैसोंक लिजी अन्यारक बीच मिं उज्याव जस बणै राँखौ, जैल दुनियाँक सब मैसों कें मुक्ति मिलि सको।”

जो अन्य-जातियोंक मैस वां छी, उं सब बड़ खुशि हबेर परमेश्वरक अराधना करणाछी। और जतुक मैसों कें परमेश्वरल छांटौ, उं पौलुसक बात मानिबेर यीशु मिं भरौस धरण लागीं। इसिक सॉर प्रदेश मिं परमेश्वरक बचन फैल गयो।

पर यहदियोंल यौ नगराँक ठुल-ठुल नेताओं कें उकसैबेर पौलुस और बरनबास कें आपण नगर बे भ्यार निकलवै दे। तब पौलुस और बरनबासल उनर खिलाफ गवाहि दिणक लिजी आपण खुटोंक धूल झाड़ी, और इकोनियुम नामक नगर मिं जानै रई। उं और दुसॉर विश्वासी खुशी और पवित्र आत्माल भरी छी।

## इकोनियुम मिं

(प्रेरितों १४:१-७)

एक यस्सी घटना इकोनियुम नगर मिं लै है। वां पौलुस और बरनबासल यहदियोंक सभा-घर मिं जैबेर यस जोरदार परचार करौ, जकें सुणिबेर यहदी और यूनानी भौत जादे मैस यीशु मिं भरौस करण भै ग्याय। पर जो यहदियोंल पौलुसक बात मिं विश्वास नि कर, उनुल दुसॉर मैसों कें इनर खिलाफ भड़का। लेकिन पौलुस और बरनबास भौत बखत तलक वां रई और निडर हबेर यीशुक बचनक परचार करनै रई। और उनर चमतकरल परमेश्वरल मैसों कें दिखा कि उनर परचार सांचि छु।

वांक जनताक द्वी धड़ है ग्याय। थ्वाड़ मैस पौलुसक तरफ छी, और थ्वाड़ यहदियोंक तरफ लै छी। लेकिन जब पौलुस और बरनबासक खिलाफवाँल दलक मैसोंल उनुकें दुडोंल मारण चा, तब उं वांबे भाजि ग्याय और लुकाओनिया प्रदेश मिं लुस्त्रा, दिरबे और वीक आँश-पासक जाँगों मिं जैबेर परमेश्वरक बचनक परचार करण लागीं।

## मैस पौलुस और बरनबास कें द्याप्त माननी

(प्रेरितों १४:८-२०)

लुस्त्रा नगर मिं उनुल एक मैस देखौ, जो जनम बे लुल छी, और कभै हिट नि सकछी। उ पौलुसक परचार ध्यानल सुणनाछी, और जब पौलुसल देखौ

कि यौ मेरि बात मिं भरौस करणौ, तब वील उधैं कौ, "उठिबेर ठाँड़ हो!" यौ सुणिबेर उ एकदम ठाँड़ हबेर घुमण लागौ।

जब वांक मैसोल देखौ कि पौलुसक कूण पर उ लुल मैस भल है गो, तब उं सब आपस मिं कूण लागीं कि यौ मैसॉक रूप मिं द्याप्त हमर बीच मिं ऐ रई! उनुल पौलुसक नाम "हिरमेस" और बरनबासक नाम "ज्यूस" धरौ जो उनार खाश द्याप्त छी। उ नगरक भ्यार ज्यूस द्याप्तक मंदिर छी। वांक पुजारिल जब यौ सुणौ, तब उ फुलमाव और बल्द लिबेर खूब भीड़क दगाड़ उनेरि पुज करणक लिजी वां आ।

जब पौलुस और बरनबासल यौ सुणौ, तब उं जोर-जोरल कूण लागीं, "भाइयो, तुम यौ के करणाछा, हम क्वे द्याप्त न्हैतियूं! हम लै तुमर जस साधारण मैस छूं! यां तुमुकैं यौ बतूणक लिजी ऐ रयूं कि यौं सब फालतू बातों कैं छोड़िबेर ज्यून परमेश्वरक बचनोंक अनुसार हिटो, जैल यौ धरति, अगाश और जे लै यैमिं छु, उ सब बणै रॉखौ। उनुल पुराण बखत मिं सब मैसों कैं आपण-आपण बाँट मिं हिटण दे। फिर लै उं आपण भल कामोंक जरियल आपण गवाहि दिनै रई। उं हमर लिजी अगाश बे द्यो और आपण-आपण बखत मिं हरेक फसलों कैं पैद करनी। उं हमुकैं अन्न दिबेर हमेरि भूक मिटूनें और उं हमर मन मिं सुख-संतोष दिंनी। आँब जब तुम उनर बारि मिं जाण गेछा, तब तुम उनर पछिल हिटो।"

फिर लै पौलुसल यौ सब बतूणक बाद बड़ मुशकिलल उनुकैं आपण पुज करण बे रोक सकौ।

लेकिन थ्वाड़ बखत बाद अंताकिया और इकोनियुम बे थ्वाड़ विरोधी मैस वां लै आई। और उनुल ऐबेर उ जनता कैं इनर खिलाफ भड़कैबेर आपण दगाड़ मिलै ले। और इनुल पौलुस कैं पकड़िबेर नगरक भ्यार लिजैबेर दुडोंल इदुक मारौ कि जब उनुल समझौ कि यौ मरि गो, तब उं उकैं छोड़िबेर न्है ग्याय। पर जब विश्वासी पौलुसक चारों तरफ जाँम हई, तब पौलुस ठिक हबेर उठौ, और नगरक भितेर गो।

## काम पुर है गो

(प्रेरितों १४:२१-२८)

दुसर दिन पौलुस बरनबासक दगाड़ दिरबे नगर मिं गो। और वां लै उनुल परमेश्वरक भलि खबरक परचार करौ, जैल भौत मैस विश्वासी बणि ग्याय। यैक बाद उं लुस्त्रा और इकोनियुमक बाँट पिसिदियाक अंताकिया



मिं लौटिबेर ऐ ग्याय। और उं सब जांग मिं विश्वासियोंक भरौस बढूंछी और उनुकें सिखूंछी कि जब तलक यीशु दुबार ऐबेर आपण राज पुर नि करन, तब तलक हमुकें भौत जादे दुःख मुशीबत सहण पड़ेलि। उनुल हरेक समुदायक अधिकारियों कें छांटौ। और बर्तक दगाड़ परमेश्वर धै बिनती करिबेर उनुकें परमेश्वरक हात मिं सौंप दे।<sup>8</sup>

यैक बाद उं पंफुलिया नगर मिं पुर्जी। और वां पेरगे नगर मिं भलि खबरक परचार करणक बाद अत्तालिया आई। वांबे उं पाणिक जहाजल अंताकियाक तरफ गेई, जांबे उनुकें परमेश्वरल यौ कामक लिजी भेजछी। और आँब उनुल यौ काम पुर करि हैछी।

वां पुजिबेर उनुल विश्वासियोंक सभा बुलैबेर उनुकें बता, कि परमेश्वरल हमर जरियल के-के काम करीं, और कसिक अन्य जातियोंक मैसोंक लिजी लै भरौस करणक शुरुवाद करी। फिर उं वां भौत बखत तलक उनर दगाड़ रई।

## यरुशलेम मिं बैठक

(पेरितों १५:१-२१)

यैक बाद थ्वाड़ यहूदी मैस अंताकिया मिं ऐबेर मैसों कें यौ सिखूण लागीं, "अगर मोशेशक नीमक अनुसार तुमर खतना नि हई हो, तब तुमुकें मुक्ति नि मिलेलि।" लेकिन पौलुस और बरनबास यौ बातक लिजी उनर दगाड़ सहमत नि छी। और यौ बातक बारि मिं उनेरि बहस शुरु है गेई। आखिर मिं यौ फैसाल हौ कि पौलुस और बरनबासक दगाड़ थ्वाड़ अंताकियाक मैस यरुशलेम जैबेर खाश शिष्योंक दगाड़ यैक बारि मिं पुछॉल। तब वांक मैसॉल उनुकें विदा करौ। और उं फीनीके और सामरी प्रदेशों बे जाण बखत वांक विश्वासियों कें लै यौ बतूनै गेई कि अन्य जाति लै यीशु मिं भरौस करण लागीं। यौ सुणिबेर वांक मैस भौत खुशि हई।

जब उं यरुशलेम पुर्जी, तब वांक विश्वासियोंल उनर स्वागत करौ। वीक बाद पौलुस और बरनबासल उनुकें बता कि परमेश्वरल उनर जरियल के-के काम करीं। थ्वाड़ फरीसी दलक मैस जो यीशु मिं भरौस करछी, ठाँड़ हबेर कूण लागीं, "हमुकें नई विश्वासियों धै कूण छु, कि उनर खतना हुण चैं और

<sup>8</sup> समुदायक अधिकारी यांस मैस छी जो दुसॉर विश्वासियोंक विश्वास बढूंछी और उनेरि मधत करछी। उं दुसरो कें सिखूंछी और परमेश्वरक कूणक अनुसार हिटणक उधारण दिंछी।

उनुल मोशेशक नीमोंक पालन लै करण चै।" तब यैक बारि मिं बात करणक लिजी खाश शिष्य और विश्वासियोंक समुदायक अधिकारी जॉम हई।

जब भौत बहस है गई, तब पतरसल ठाँड़ हबेर कौ, "भाइयो, तुमुकें पत छु कि थ्वाड़ बखत पैली परमेश्वरल मिक्कें छांटौ, कि जो यहूदी नि छी, मी उनुकें लै यीशुक भलि खबर बतूं, ताकी उं लै यौ सुणिबेर यीशु मिं भरौस धरि सको। और परमेश्वरल उनुकें आपण पवित्र आत्मा दिणक जरियल (जसिक वील हमुकें लै पवित्र आत्मा दी रॉखी) यौ दिखा कि मी अन्य जातियों कें छांटिबेर उनुकें लै प्रेम करनू। परमेश्वरक लिजी हमर और उनर बीच मिं के फरक न्है। जसिक उनुल हमार पाप माफ करीं, उसिके उनार पाप लै माफ करीं, किलैकि उनुल यीशु मिं भरौस करौ। जब परमेश्वरल दिखै रॉखौ कि मी अन्य जातिक मैसों कें केवल आपुं मिं विश्वास करणल उनुकें बचै ल्यूल, तब तुम उनुकें यौं सब नीमोंक पालन करणक लिजी जोर-जबरदस्ती किलै करणाछा? जनर पालन न हमार पुरखोंल करि सकौ और न हम करि सकणयूं। किलैकि हम केवल प्रभु यीशुक दयाल बचि सकनू, और उं लै।"

पौलुस और बरनबास उं सब ठुल-ठुल कामोंक बारि मिं उनुकें बतूणाछी, जो परमेश्वरल अन्य जातियोंक बीच मिं उनर जरियल करछी। और सब मैस चुपचाप हबेर उनेरि बात सुणनाछी। जब उनेरि बात पुर है गई, तब याकूबल मैसों थैं कौ, "भाइयो, आँब मेरि बात सुणो। पतरसल लै हमुकें समझाछी कि परमेश्वरल अन्य जातियों मिं कसिक आपणि किरपा करी। जसि भविष्यबाणी नबियोंल करि रॉखछी कि अन्य जातिक मैस लै परमेश्वरक तरफ आल, ठिक उसै हौ। किलैकि धर्म-शास्त्र मिं लेखी छु,

"परमेश्वर कूं, मी यैक बाद फिर लौटिबेर ऊंल,

और दाउदक जो राज्यक अंत है गो, मी उकें दुबार बणूंल।

और यैक लिजी दुनियाँक सब मैस म्यर दगाड़ आल, और जतुक अन्य जातियोंक मैसों कें मील बुला, उनुकें लै मी अपणूंल। यौ बात उं प्रभुक छन जो संसारक शुरुवाद बे यौ दिखूणौ।"

यैक लिजी, हे भाइयो, मी यौ नतिज मिं पुजि रयूं कि जो अन्य जातिक मैस प्रभु परमेश्वरक तरफ मुड़नी, उनुमिं नीमक जादे भार नि खिती जाओ। यैक लिजी उनुकें खतना करण जरूरी न्है। बल्किन उनुकें चिट्ठी लिखबेर बताई जाओ कि मूरतियों कें चढ़ाई खाँण, दम घोटिबेर मारी जानवरोंक शिकार, खून खाँण और व्यभिचार बे तुम सब परहेज करिया। किलैकि भौत बखत पैली बे नगर-नगरोंक यहूदियोंक सभा घरों मिं मोशेशक बताई यौं नीमोंक परचार करणी छन।"

## अन्य-जातियोंक लिजी चिट्ठी

(प्रेरितों १५:२२-३३)

तब उनुल यौ फैसॉल लै करौ कि हम आपुं मिंबे थ्वाड़ मैसों कै छांटेबेर अंताकिया मिं पौलुस और बरनबासक दगाड़ भेजनु। और तब उनुल युदस जकै बरनबास लै कूँछी और सिलास कै छांटौ, और उनर हात यौ चिट्ठी भेजी,

“हमार मित्रो, हम खाश शिष्य और अधिकारियोंक तरफ बे, तुम जो अंताकिया, सीरिया और किलिकिया मिं रुणी अन्य जातियोंक भै छा, हम तुमुकै प्रणाम करनू। हमुल सुणौ कि हमार यांक थ्वाड़ मैसॉल जनुकै हमुल क्वे जिम्मेदारि नि दी रॉखछी, उनुल तुमुकै गलत बता कि अगर मोशेशक नीमक अनुसार तुमर खतना नि हई हो, तब तुमुकै मुक्ति नि मिलेलि। यैक लिजी हमुल मिलिबेर यौ फैसॉल करि रॉखौ, कि हम थ्वाड़ भैनों कै तुमर पास यैक लिजी भेजुंल, कि जो हमुल यौ चिट्ठी मिं लिख रॉखौ, उं तुमुकै बताल। हम उनुकै हमार प्रिय भैनों पौलुस और बरनबास, जनुल आपण जिन्दगी प्रभुक काम करणक लिजी दी रॉखी, उनर दगाड़ तां भेजुंल। तुम मूरतियोंक सामण चढ़ाई शिकार, दम घोटिबेर मारी जानवरोंक शिकार और क्वे लै जानवरक खून नि खाया। और व्यभिचार बे आपण कै बचाया, किलैकि यस्सै करण मिं तुमर भल छु। पवित्र-आत्मा और हमुल यौ ठिक समझौ कि यौ बातोंक अलावा काट करण और के दुसर खाश नीमोंक पालन तुमुकै नि करण पड़ो। भौत प्रेमल, तुमार भै।”

यैक बाद उं विदा हबेर अंताकिया मिं न्है ग्याय, और जब वां उनुल आपण समूह जाँम करौ, तब यौ चिट्ठी उनुकै सौपि दे। और जब वां जाँम हई मैसॉल यौ चिट्ठी पढ़ी, तब उं सब खुशि हबेर जोशल भर ग्याय।

युदस और सिलासल लै देर तलक उनुकै समझैबेर उनर जोश बढ़ा। थ्वाड़ बखत वां रैबेर युदस फिर यरुशलेम वापिस न्है गोय, लेकिन सिलास, पौलुस और बरनबास अंताकिया मिं रई। और उं दुसरोक दगाड़ परमेश्वरक बचन और भलि खबरक परचार करनै रई।

## पौलुसक बरनबास बे अलग हुण

(प्रेरितों १५:३६-४०, १६:१-५)

थ्वाड़ बखतक बाद पौलुसल बरनबास थै कौ, "हितो, जो-जो नगरों मिं हमुल पैली जैबेर परमेश्वरक बचनक परचार करछी, वां जैबेर वांक

विश्वासियोंक दगाड़ भेट-घाट करिबेर देखनू कि उनार हाल-चाल काँस है रई।" तब बरनबास चांछी कि मरकुस लै उनर दगाड़ वां जाओ, पर पौलुस यस करण ठिक नि समझछी, किलैकि पैली वील उनुकें पंफुलिया मिं छोड़ि देछी। यौ बातल पौलुस और बरनबास एक दुसर बे अलग है ग्याय। और बरनबास मरकुस कै आपण दगाड़ लिबेर समुद्रक बाँट कुप्रुस न्है गोय, लेकिन पौलुसल सिलास कै छांटौ, और दुसॉर विश्वासियोंल उनुकें परमेश्वरक हात मिं सौंप दे। वीक बाद उं वांबे सीरिया और किलिकिया मिं जैबेर वांक विश्वासियोंक भरौस लै बढूण लागीं।

यैक बाद पौलुस दिरबे और लुस्त्रा नगर मिं लै पुर्जी, जां तिमोथी नामक एक विश्वासी रूछी। वीक इज एक यहूदी विश्वासी और बौज्यू यूनानी छी। तिमोथियक लुस्त्रा और इकोनियुसाक विश्वासियों मिं भलौ नाम छी। पौलुस चांछी कि यौ लै हमर दगाड़ यात्रा मिं हिटो। उ प्रदेश मिं रुणी यहूदी मैसोंक कारणल पौलुसल तिमोथियक खतना करवा।<sup>9</sup> उनुल अलग-अलग नगरों मिं घुमि-घुमिबेर मैसों तलक उ फैसॉल कै पुजा जो यरुशलम मिं खाश शिष्योंल और अधिकारियोंल करि राँखछी, कि उं मैस उनुकें मानो। इसिक वांक विश्वासियोंक भरौस मजबूत और उनेरि गिनती लै लगातार बढनै रै।

## पौलुस मकिदूनिया जां

(पेरितों १६:६-१०)

पवित्र आत्माल पौलुस, सिलास और तिमोथी कै आँशिया प्रदेश मिं परमेश्वरक बातोंक प्रचार करणक लिजी मना करौ। यैक लिजी उं फ्रुगिया और गलातिया प्रदेशक बाँट बे अधिल गई। जब उं मुसिया प्रदेशक वड़ मिं पुर्जी, तब उनुल बिथुनिया नगर मिं जाणक कोशिश करी। लेकिन यस करणक लिजी लै पवित्र-आत्माल उनुकें मना करौ।<sup>10</sup> यैक लिजी उं मुसिया पार करिबेर त्रोआस नगर मिं आई। वां पौलुसल रात मिं दर्शन देखौ कि एक मकिदूनियाक रुणी मैस ठाँड़ हबेर उनुधै गुजारिश करणौ, कि तुम समुद्र पार मकिदूनिया मिं ऐबेर हमेरि मधत करो!"

<sup>9</sup> जबकि पौलुस खतना करणक लिजी सहमत नि छी, तब लै वील तिमोथियुसक खतना करवा। उ परचारक काम मिं वीक मधत लिण चांछी और उकें मालुम छी कि अगर वीक खतना नि करायी जाओ, तब यहूदी वीक बात नि सुणो। लेकिन पौलुस भली कै जाणछी कि हमर भरौस करणल हम बचुल, क्वे रीतीक पालन करणल नै।

<sup>10</sup> यौ सब नगर आजक तुर्की देश मिं छन।

जस्सै उकैँ यौ दर्शन मिलौ, हम वां पुजणक कोशिश मिं लागि गयाय।  
किलैकि हम समझि गयाछी कि परमेश्वर हमुकैँ वांक मैसोंक बीच मिं  
भेजणक लिजी बुलूणई।<sup>11</sup>

## फिलिप्पी मिं

(प्रेरितों १६:११-१५)

हमुल त्रोआस बे समुद्रक आपण सफर शुरु करौ। पैल दिन हम पाणिक  
जहाजल सिद्द समुत्राके और तब वांबे नेआपुलिसक बॉट फिलिप्पी गोयूं।  
फिलिप्पी मकिदुनियांक खाश नगर और रोमियोंक बस्ती छु। हम थ्वाड़ दिन  
वां रयूं। अरामक दिन हम यौ सोचिबेर नगरक भ्यार आयूं कि यां कैँ गाड़क  
किनॉर मिं यहूदी मैस प्रार्थनाक लिजी जॉम हैरा ह्वाल। और वां जैबेर हम  
थ्वाड़ स्यैणियोंक दगाड़ बात-चीत करण लागि गयूं। उं स्यैणियों मिंबे एकक  
नाम लुदिया छी, उ थुआतीरा नगरकि रुणी और महैंग बैगनी लुकुड़ोंक धंध  
करछी। उ यहूदी नि हुण पर लै परमेश्वरक अराधना करछी। उ हमेरि बात  
सुणणैछी और परमेश्वरल उकैँ पौलुसकि बात समझणक लिजी वीक मन  
तैय्यार करौ। उ यीशु मिं भरौस करण लागी, फिर उ और वीक परिवारल  
पाणिक-बपतिस्मा ली ले। यैक बाद वील हमुधैँ बिनती करी कि अगर तुम  
मिकैँ सांचि मिं प्रभु यीशु मिं भरौस करणी मानछा तब म्यर घर हिटो। इसिक  
उ हमुकैँ मनैबेर आपण घर ली गे।

## पौलुस और सिलास जेल मिं

(प्रेरितों १६:१६-४०)

एक दिन जब हम फिर उ प्रार्थनाक जॉग जाणाछी, तब बॉट मिं हमेरि भेट  
एक जवान दासीक दगाड़ है। उ एक भूतक जरियल भविष्यबाणी करछी,  
जैल उ आपण मालिकक लिजी भौत डबल कमूछी। यौ पौलुस और हमर  
पछिल-पछिल बे जोर-जोरल कूण लागी, "यौं सबों है टुल परमेश्वरोंक  
सेवक छन, जो तुमुकैँ मुक्तिक बॉट बतूणक लिजी ऐ रई!" उ भौत दिनों बे  
यस्सै करणैछी। आखिर मिं पौलुसल तंग हबेर पछिल मुड़िबेर उधैँ कौ, "मी  
यीशु मसीक नामल तुकैँ हुकुम दिनू, तु यौ चेलि मिंबे भ्यार निकल!" और  
भूत उ बखतै उमिंबे भ्यार निकलि गीय।

<sup>11</sup> यौ मकिदूनिया आजक यूनान देश छु।

जब उ चेलिक मालिकोंल देखौ कि यैबे हमेरि कमाइक जरिया खतम है गो, तब उं पौलुस और सिलास कै पकड़िबेर न्याय करणी सैपोंक सामण खींचबेर ली गई। और उनुधैं यस कौ, "यौं यहूदी मैस छन, और हमर नगर मिं अशान्ति फैलूणई! यौं येसि



जेल मिं पौलुस और सिलास

रीती-रिवाजोंक परचार करणई, जकैं हम रोमियोंक लिजी मानण ठिक नहैं!" तब तलक वां एक ठुली भीड़ लै जॉम है गई, और फिर सैपोंल उनार लुकुड फाड़िबेर आपण सिपैनों कै इनुकैं चाबुक मारणक हुकुम दे। उनुल पौलुस और सिलास कै चाबुकोंल खूब जादे मारणक बाद उनुकैं जेल मिं खिति दे, और जेलर कै इनर बारि मिं खाश चौकसी करणक हुकुम लै दे। यौ हुकुम पैबेर जेलरल उनुकैं जेलक भितेर वालि कोठरि मिं खितिबेर उनार खुटों कै जंजीरल बाद दे।

उ दिने अधरात मिं जब पौलुस और सिलास परमेश्वरक अराधना करणाछी, और सब कैदी सुणनाछी, तब एकाएक इतुक जोरदार भूचाल आ कि जेलक नींव तलक हिल गई। जेलाक सब द्वार खुलि ग्याय, और यैक दगाड़ सब कैदियोंक जंजीर लै खुलि ग्याय।

जेलरक नीन टुटण पर जब वील यौ देखौ कि जेलाक सब द्वार खुलि रई, तब वील सोचौ कि आब तलक सब कैदी भाजि गई! यैक लिजी वील आपण आत्म-हत्या करणक लिजी आपणि तलवार खींच रैछी। लेकिन पौलुसल जोरल-जोरल कौ, "खबरदार, तु आपुं कै के नि कर, हम सब यै छूं!" यौ सुणिबेर जेलरल बत्ती मंगवैबेर भितेर दौड़ौ, और डरनै-कामनै पौलुस और सिलासक सामण जैबेर उनार खुटों मिं पड़ि गीय। यैक बाद वील उनुकैं भ्यार लिजैबेर उनुधैं पुछौ, "गुरुज्यू, आब मी कसिक बचुं?" तब उनुल उधैं कौ, "जब तु प्रभु यीशु मिं भरौस करलै, तब तु और त्यर पुर परिवार कै मुक्ति मिलेलि।"

तब उनुल जेलर और वीक परिवार कै यीशुक बारि मिं बता। यैक बाद उनर पुर परिवारल पाणिक-बपतिस्मा ले। फिर जेलरल पौलुस और बरनबास कै आपण घर लिजैबेर उनार घौ धोई, खाण खवा, और आपण पुर परिवारक दगाड़ उं सबोंल खुशी मनै। किलैकि ऐल उनुल परमेश्वर मिं भरौस करौ।

राति पर न्यायालयक सैपोल जेलर कै हुकुम भेजिबेर कौ कि पौलुस और सिलास कै छोड़ि दियो। जब जेलरल यौ खबर पौलुस कै बतै, तब पौलुसल उधैं कौ, "हम रोमी नागरिक छूं, फिर लै उनुल हमर कसूर साबित करी बिना हमुकै पकड़िबेर सबनक सामण चाबुक मारौ, और आब चुप-चापल हमुकै चोरोक चारि भ्यार उणक लिजी कूणई! यस नि हो। जब उं खुद ऐबेर हमुकै यांबे निकालाल, तब हम यांबे सबनक सामण भ्यार जूल।" <sup>12</sup>

यौ बात सुणिबेर सैप डरि ग्याय, किलैकि उनुकै पत्त नि छी कि पौलुस और सिलास रोमी नागरिक छन। यैक लिजी उनुल खुद ऐबेर उनुधैं माफि मांगी और भ्यार ली जैबेर उनुधैं यौ बिनती करी कि तुम यौ नगर छोड़िबेर जै दियो।

पौलुस और सिलास वांबे निकलिबेर लुदियाक घर गई, और वां विश्वासियोंक दगाड़ भेट करिबेर उनेरि हिम्मत बढूणक बाद वांबे न्है ग्याय।

## विश्वासियोंक खिलाफ दंग-फसाद

(पेरितों १७:१-१५)

यैक बाद उं थिसलुनिका पुर्जी, जां यहूदियोंक एक सभा-घर छी। पौलुस वां उनर दगाड़ भेट करणक लिजी गो, जस कि वीक आदत छी। और वां ऐरामक तीन अलग-अलग दिनों मिं उनर दगाड़ बात-विचार करण मिं धर्म-शास्त्रिकि बात बतैबेर साबित करनै रौ कि मुक्तिदाताक लिजी दुःख उठूण और मरियों मिंबे दुबार ज्यून हुण जरूरी छी। वील यौ लै कौ, "यीशु जनर परचार मी तुमर बीच मिं करणयूं, वीं मुक्तिदाता छन!" वीक यौ बात मिं थ्वाड़ यहूदी मैसोल विश्वास करौ और उं उनर दगाड़ ऐ ग्याय। इनर अलावा भौत यूनानी बैगों और थ्वाड़ खाश-खाश स्यैणी लै इनर दगाड़ जुड़ ग्याय।

यौ देखिबेर थ्वाड़ यहूदी जलन करण लागीं, और वांक बजाराक थ्वाड़ गुण्डोंक मधतल पुर नगर मिं दंग-फसाद करि दे। और उं पौलुस और सिलास कै नगर-सभाक सामण ठाँड़ करणक मंशाल यासोनक घर ऐ धमकीं, जां उनुल सोचौ कि हमुकै पौलुस मिलल। पर वां पौलुस और सिलासक नि मिलण पर उं यासोन और थ्वाड़ दुसॉर विश्वासियों कै खींचबेर हाल्ल-गुल्ल करनै नगराक सैपोक सामण लिजैबेर कूण लागीं, "यौं मैस सॉर दुनी मिं

<sup>12</sup> रोमी मैस दासों और अन्य मैसों कै बिना कसूर साबित करयकै सजा दिंछी, लेकिन कवे लै रोमी कै कसूर साबित करी बिना मारण मना छी। जबकि पौलुस यहूदी छी, उ रोमी नागरिक लै छी किलैकि वीक बीज्यू रोमी छी।

उलट-पुलट मचूणई, और ऑब यां लै ऐ गेई! यासोनल इनुकें आपण घर मिं धरि रॉखौ। यौ सब हमर सम्राटक खिलाफ बात करनी, किलैकि उं कूनी कि यीशु नामक और क्वे दुसर रॉज छु।"

यौ सब सुणिबेर सैप लै बेचैन है ग्याय और वां सब जॉग भौत हल-चल मचि गेई। आखिरकार उनुल यासोन और दुसॉर विश्वासियों कें जमानत मिं छोड़ि दे।

और दुसर तरफ विश्वासियोंल रातों-रात पौलुस और सिलास कें बिरीया नगर भेजि दे।

वां पुजिबेर उं यहूदियोंक सभा-घर मिं गेई। यांक यहूदी मैस थिसलुनिकाँक मैसों हबेर जादे इच्छुक छी कि उं क्वे नई बातों कें समझि सकौ। और उं ध्यान लगैबेर परमेश्वरक बचन सुणछी, और उकें परखणक लिजी रोज धर्म-शास्त्र मिं वीकि ढून-खोज करछी। उनुमिं बे भौत मैस विश्वासी बणि ग्याय। और इनर अलावा थ्वाड़ खाश यूनानी स्पैणि-बैगोल लै उनेरि बातों मिं विश्वास करौ।

जब यौ बातक पत्त थिसलुनिका मिं रुणी यहूदियों कें चलौ, तब उं यौ नगर मिं लै ऐबेर यांक मैसों कें विश्वास करणक लिजी रोकण और वां दंग-फसाद करण लागीं। यैक लिजी विश्वासियोंल पौलुस कें यांबे भेजि दे, और उ समुद्रक तरफ न्है गोय। पर सिलास और तिमोथी वैं रई। यांक मैस पौलुसक दगाड़ अथेने नगर तलक वीक दगाड़ गेई, और वीक यौ जवाब लिबेर लौटीं, "जदुक जल्दी है सकुं, तुम सिलास और तिमोथी कें म्यर पास भेजि दिया।"

## पौलुस अथेने मिं

(प्रिती १७:१६-३३)

जब पौलुस अथेने नगर मिं सिलास और तिमोथीक इंतजार करणौछी, उ बखत यौ नगर मिं देवि-द्याप्तोंक मूरतियोंक भरमार देखिबेर उ भौत जादे परेशान हौ। यौ कारणल उ यहूदियोंक सभा-घर मिं वांक मैसोंक दगाड़ बात करण लागौ, और बजार मिं उणी-जाणियोंक दगाड़ लै बहस करछी। वां पौलुसकि भेट थ्वाड़ अलग-अलग पंडितोंक दगाड़ है। जब उ यीशु और उनर दुबार ज्यून हुणकि भलि खबरक परचार करणौछी, तब उनुल कौ, "यौ के बकवास छु?" दुसरोंल बता, "यौ क्वे विदेशी देवि-द्याप्तोंक बारि मिं बतूणी जस लागणौ।" यैक लिजी उं पौलुस कें आपण दगाड़ सभाक सामण



ली गई और उन्हें कौ, "तुम हमुकेँ बताओ कि के नई बात बतूणाछा? तुम येसि बात करछा, जो हमुकेँ अजीब लागूं, फिर लै हम उनर मतलब जाणन चानूं।" (अथेने नगराँक सब मैस और वां रुणी विदेशी मैस लै नई-नई बात सुणन और उकेँ करण मिं आपण बखत बितूँछी।)

तब पौलुसल उनेरि सभाक सामण ठाँड़ हबेर कौ, "भाइयो, मी यस देखणयूं, कि तुम सब भौत द्याप्तोक पुज करछा।" जब मी घुमनै-फेरनै तुमेरि पुजकि चीज-बस्त देखणौछी, तब मिकेँ एक वेदी मिली, जैमिं लेखी छी "अनजान द्यप्तकि"। जैक पुज तुम अनजान मिं करछा, मी वीक बारि मिं तुमुकेँ सुणूं।

जो परमेश्वरल यौ संसार और जे लै यैमिं छु, उ सब बणा, उ अगाश और धरतिक प्रभु छूं। उं मैसक हातल बणाई मंदिरों मिं नि रुन। और न उनुकेँ के चीजक कमी छु, जो कि उं मैसोक हातल आपणि सेवा लियो। उं सबों केँ प्राण, जिन्दगी और सब चीज-बस्त दिंनी। उनुल शुरु मिं एककेँ मैस बे सब मैसों केँ पैद करौ, कि उं सारि धरति मिं भर जाओ। उनुलै मैसोक जिन्दगीक बर्ष और उनर रुणक जाँग लै उनुकेँ दी रॉखी। परमेश्वरक मंशा छी कि मैस उनुकेँ ढूनिबेर पै लै सकनी, किलैकि उं हम सबनक नजिक छन। हम उनेरि किरपाल चल-फिरबेर ज्यून रूंनू। तुमरै थ्वाड़ कवियोंल केँ रॉखौ, "हम उनर नॉनतिन छूं।" सांचि मिं हम परमेश्वरॉक नॉनतिन छूं, और हमुकेँ यौ नि समझण चैन कि उं सुन, चानदि या ढुङक मूरतिक चारि छु, जो मैसक सोच-विचारक पैदावार छु। पैलियाँक मैस परमेश्वर केँ नि जाणछी, यैक लिजी परमेश्वरल उनार पापों केँ जो उनुल अनजान मिं करीं, माफ करि है। लेकिन ऐल बे सब मैसों केँ आपण मन पाप बे बचूण छु, किलैकि उनुल उ दिन ठैरै रॉखौ, जदिन उं पैलियै बे आपण ठैराई मैसक जरियल सॉर धरतिक मैसोक न्याय धर्मल करॉल। परमेश्वरल उ मैस केँ मरियों मिंबे दुबार ज्यून करिबेर आपण यौ फैसॉलक सबूत लै दी रॉखौ।"

जब वांक मैसॉल यौ मरियों मिंबे दुबार ज्यून हुणकि बात सुणी, तब थ्वाड़ मैसॉल वीक मजाक उडै, पर दुसॉर मैसॉल यस कौ, कि यौ बारि मिं हम तुमेरि बात फिर कभतै सुणुंल।

तब पौलुस उनर बीच बे न्है गोय। फिर लै थ्वाड़ मैस वीक दगाड़ लागि ग्याय और विश्वासी बणि ग्याय।

## पौलुस कुरिन्थुस मिं

(प्रेरितों १८:१-२३)

यैक बाद पौलुस अथेने नगर छोड़िबेर कुरिन्थुस नगर मिं आ, जां उनेरि भेट अक्विला नामक मैसक दगाड़ है। उ थ्वाड़ै बखत पैली आपणि स्यैणि प्रिसिल्ला दगाड़ रोम बे यां ऐ रौछी, किलैकि सम्राट क्लौदियुसल यौ हुकुम दी रॉखछी कि सब यहूदी वां बे न्है जाओ। पौलुस वां उनर दगाड़ रैबेर काम करण लागौ, किलैकि उनर अनुसार उ लै आपण खर्चक लिजी तम्बू बणूणक काम करछी।

पौलुस हर ऐरामक दिन यहूदियोंक सभा-घर मिं जैबेर बात और बहस करिबेर यहूदी और यूनानियों कें समझूणक कोशिश करछी। जब सिलास और तिमोथी मकिदूनिया बे आई, तब पौलुस आपण पुर बखत बचन सुणूण मिं बितूछी, और यहूदियों कें यौ सबूत दिणौछी कि यीशु परमेश्वरक वैद करी मुक्तिदाता छन। पर जब उं पौलुस कें गाड़ ठोकिबेर वीक विरोध करण लागीं, तब वील उनर सामण आपण हात टट्कैबेर उनुधैं कौ, "आपण बर्बादिक जिम्मेदार तुम खुद ह्वला, यैमिं म्यर क्वे कसूर न्हैं। आज बे मी परमेश्वरक यौ बात बतूणक लिजी केवल अन्य जातियोंक पास जूंल।"

यैक लिजी पौलुस सभा-घर छोड़िबेर तितियुस-युस्तुस नामक परमेश्वरक भगतक घर ऐ गोय, जो अन्य जातिक छी। वीक घर सभा-घरक बगल मिं छी। सभा-घरक ठुल सैप और वीक सॉर परिवारल पौलुसक बात सुणिबेर यीशु मिं विश्वास करौ। और उनर अलावा भौत दुसॉर मैसॉल लै विश्वास करिबेर पाणिक-बपतिस्मा ले।

एक रात प्रभु परमेश्वरल पौलुस कें दर्शन दिबेर कौ, "निडर हबेर सबों कें बतूनै जा और चुप नि रये। मी त्यर दगाड़ छूं, और क्वे लै त्यर के नि बिगाड़ सको, किलैकि यौ नगर मिं भौत म्यार मैस छन।" फिर पौलुस ढेड़ साल तलक उ नगर मिं रैबेर मैसों कें परमेश्वरक बारि मिं बतूनै रौ।

लेकिन जब गल्लियो रोमी राजपाल बणौ, तब यहूदियोंल मिलिबेर पौलुस मिं हम्मल करिबेर पकड़ि ले और राजपालक सामण ली गई। और उकें बतूण लागीं कि पौलुस मैसों कें परमेश्वरक अराधना करणक यस तरिक बतूणौ, जो हमार नीमोंक अनुसार ठिक न्हैं। यौ सुणिबेर जस्सै पौलुस आपण बात कूणी छी, उस्सै राजपालल यहूदियों धैं कौ, "अगर यौ मुकरदम गलत काम या क्वे जुर्मक हुंछी, तब मी तुमेरि बात कें भली कैबेर सुणछी। पर यौ सब

तुमार नीम और धरमक बारि मिं छु, जैमिं म्यर कवे मतलब न्है। यैक फैसॉल तुम आफी करो!" और फिर वील उनुकै अदालत बे भ्यार निकलवै दे।

तब उनुल सभा-घरक मुखिया सोस्थेनेस कै पकड़िबेर अदालतक सामण खूब मारौ, लेकिन राजपालल कवे ध्यान नि देय।

यैक बाद भौत दिनों तलक कुरिन्थुस मिं रुणक बाद पौलुसल वांक विश्वासियों धै विदा लिबेर प्रिसिल्ला और अक्विलाक दगाड़ वांबे समुद्रक बाँट सीरिया देश न्है गयाय। जब उं इफिसुस नगर पुर्जी, तब पौलुसल यहूदियोंक सभा-घर मिं जैबेर उनर दगाड़ बात-चीत करी। उनुल पौलुस धै बिनती करी, कि तुम थ्वाड़ बखत तलक आइ हमर दगाड़ यां रओ, पर वील नि मानि। और उनुबे विदा लिबेर पौलुसल कौ, "अगर परमेश्वर चॉल, तब मी यां तुमर पास दुबार ऊंल।" यैक बाद उ प्रिसिल्ला और अक्विला कै वै छोड़िबेर कैसरिया बन्दरगाहक बाँट यरुशलेम मिं आ, और वांक विश्वासियों कै भेटिबेर अंताकिया न्है गोय। वांबे उ गलातिया और फ्रुगियाक सब नगरों मिं घुमि-घुमिबेर विश्वासियोंक विश्वास बढ़नै रौ।

## अपुलोस लै यीशुक परचार करुं

(प्रेरितों १८:२४-२८)

उ बखत अपुलोस नामक एक यहूदी मैस इफिसुस नगर मिं पुजौ। वीक जनम-भूमी सिकंदरिया छी। उ बात-बिचार और धर्म-शास्त्रक ज्ञान मिं पंडित छी। वील यीशुक बारि मिं सुण राँखछी और यैक बारि मिं भौत उत्सुक हबेर दुसरों कै सिखूणौछी, लेकिन उकै पुर बात मालुम नि छी। जब प्रिसिल्ला और अक्विलाल सभा-घर मिं वीक परचार सुणौ, तब उं उकै आपण दगाड़ ली गई और उकै यीशुक बारि मिं सब बातों कै सिखूण लागीं।

जब अपुलोसल उनुकै समुद्रक पार यूनान देश मिं जाणकि मंशा बतै, तब इफिसुसक सब विश्वासियोंल उकै और लै जादे हिम्मत दे। और उनुल उकै यूनान देश मिं रुणिवॉल विश्वासियोंक लिजी चिट्ठी लै दे, कि उं तुमर स्वागत करो। अपुलोसल यूनान देश मिं पुजिबेर वांक विश्वासियोंक भौत मधत करी। वील सबनक सामण यहूदियोंक बातोंक काट करी, और धर्म-शास्त्रक अनुसार यौ साबित करौ कि यीशु हमर मुक्तिदाता छन।

## पौलुस इफिसुस मिं

(प्रेरितों १६:१-१२)

जब अपुलोस यूनान देश मिं छी, उ बखत पौलुस घुमि-घुमिबेर इफिसुस पुजौ। वां एक दिन वीक भेट लगभग बार विश्वासियोंक दगाड़ है।<sup>13</sup> पौलुसल उनुधै पुछौ, "के विश्वास करण बखत तुमुकें पवित्र-आत्मा मिलछा?" उनुल कौ, "ना, हम यैक बारि मिं के नि जाणन।" फिर पौलुसल उनुधै पुछौ, "तब तुमुकें कस किसमक पाणिक-बपतिस्मा मिलौ?" उनुल कौ, "यहूनाक किसमक।"

यौ सुणिबेर पौलुसल उनुधै कौ, "यहूनाक पाणिक-बपतिस्माक मतलब यौ छी कि तुम आपण पापक पश्चाताप करिबेर परमेश्वरक बाँट मिं हिटो। यहूना यौ लै कूँछी कि म्यर बाद उणी मुक्तिदाता मिं भरौस करिया। और ऐल यौ मुक्तिदाता ऐ गो, और उं प्रभु यीशु छन।" यौ सुणिबेर उनुल यीशुक नामल पाणिक-बपतिस्मा ले। और जब पौलुसल उनुमिं आपण हात धरौ, तब उनुमिं पवित्र-आत्मा उतरौ, जैल उं अलग-अलग भाषा मिं बुलाण और उ बात करण लागीं जो परमेश्वरल उनुकें कूण दे।

यैक बाद पौलुस तीन म्हेण तलक बेधड़क सभा-घर मिं जैबेर यहूदियो कें परमेश्वरक राज्यक बारि मिं परचार करनै और उनुकें समझनै रौ। लेकिन उनुमिंबे थवाड़ मैस भौतै जिद्दी छी और उनुल यौं बातों मिं के विश्वास नि कर, और सभा-घर मिं यौं बातोंक खिलाफ लै बुलाण लागीं। यैक लिजी पौलुस दुसॉर विश्वासियोंक दगाड़ यहूदियों बे अलग है गोय, और रोज परमेश्वरक बचनक परचार तुरंतुसक स्कूल मिं करण लागौ।

वील यौ काम द्वी साल तलक इसिके लगातार करौ, जैल यौ ऑशिया प्रदेशोंक सब मैसोंल परमेश्वरक बचन सुणौ। और पौलुसक जरियल परमेश्वरल मैसों कें भौत दंग कर दिणी काम करीं। यां तलक कि अगर क्वे बिमार मैस पौलुसक रूमाल या झाड़न कें लै छुड लिंछी, तब उ भल है जांछी। और मैसों मिंबे भूत लै निकलि जांछी।

## मैसोंक जरियल तंत्र-मंत्र बन्द हुण

(प्रेरितों १६:१३:२०)

यौ बखत सात यहूदी भैनोंल यां-वां घुमिबेर यीशुक नामल भूतों कें निकालणक कोशिश लै करी। उनुल एक भूत धै कौ, "यीशु, जैक परचार

<sup>13</sup> इफिसुस आजक तुर्की देश मिं छु।

पौलुस करुं, वीक नामल तु यौ मैस मिंभे भ्यार निकल।" लेकिन भूतल उनुधैं कौ, "मी यीशु कैं जाणनू, और पौलुस कैं लै पछ्याणनू, लेकिन तुम को छा?" यौ कैबेर उ मैस जैमिं भूत छी, उ सबों कैं ज्यै लागौ। वील इनेरि येसि बुरिगत करि दे, कि उं सब नॉडडै और घैल हबेर वांभे भाजि गयाय।

यौ बात वांक सब मैसों कैं पत्त चल गई, और इफिसुस मिं सब जाँग प्रभु यीशुक महिमा हुण लागी। भौत मैसोंल आपण पापों कैं कबूल करौ। उनुमिं थ्वाड़ जगरी लै छी, जनुल आपण जाँद-टुनक सबासब पुस्तक जाँम करिबेर आँग लगै देई। उं पचास हजार चान्दिक सिक्कों हबेर ले जादे कीमति छी। इसिक वां परमेश्वरक बचन तेजील फैलनै और वीक असर लै बढ़नै गो।

## इफिसुस मिं हाल्ल-गुल्ल

(प्रेरितों १६:२१-४१)

यौं सब बातोंक बाद पौलुसल मकिदूनिया और यूनानक बाँट यरुशलेम जाणक फैसाल करौ। वील कौ, "यरुशलेमक बाद मी रोम मिं लै जैबेर यौ काम करुल।" वील आपण दगडुवों मिंभे तिमोथी और एरस्तुस कैं मकिदूनिया भेजौ, और आपुं थ्वाड़ दिनों तलक इफिसुस मिं रौ।

लेकिन पौलुसक वांभे जाण है पैली उ नगर मिं विश्वासियोंक खिलाफ हाल्ल-गुल्ल हौ। देमेत्रियुस नामक सुनार अरतिमिस देवीक मंदिरक चान्दिक मूरतियों कैं बणूणक काम दिलैबेर शिल्पकारों कैं भौत काम दिलूछी, जैल उनुकैं भौत फैद हुंछी। वील यौं शिल्पकारों और यौ काम मिं लागी दुसॉर कामदारों कैं लै जाँम करिबेर कौ, "तुम सब जाणछा कि यौ कामल हमेरि कतुक जादे आमदनी हुं। लेकिन तुमुल देख-सुण राँखौ कि उ पौलुसल पुर आशिया मिं मैसों कैं समझै-समझैबेर भड़कै है कि हातल बणाई मूरती मिं द्याप्त नि हुंन। यैल न केवल हमर कारोबार मिं फरक पड़णौ, बल्किन अरतिमिसक मंदिरोंक लै के मान नि रओ। जो देवीक पुज यौ देश और पुर धरति मिं हुं, वीक नाम-निशाण सब मिटि जॉल!"

यौ सब बात सुणिबेर मैसों कैं रीश ऐ गई, और उं जोर-जोरल अरतिमिस जिंदाबादक नॉर लगूण लागीं। यौ बातल पुर नगर मिं हड़-बड़ाहट मचि गई। उं पौलुसक दगडुवों गायुस और अरिस्तुखुस कैं र्खीचबेर आपण सभाक सामण ली गई। पौलुस लै उ सभा मिं जाण चाँछी, लेकिन विश्वासियोंल उकैं नि जाण देय। आशियाक थ्वाड़ ठुल सैप पौलुसोंक दगडु छी। उनुल

लै वीक लिजी बिनती करिबेर जबाब भिजवा कि तुम उ सभा मिं जाणक हिम्मत नि करिया!

उ सभा मिं हकाहाक मचि रैछी, सब अलग-अलग बात कूणाछी। भौत मैसों कै यौ लै मालुम नि छी कि हम यां किलै जॉम है रयूं। तब थ्वाड़ यहूदी मैसोंल सिकंदर नामक मैस कै भीड़ कै समझूणक लिजी अधिल धक्यै दे। लेकिन जब उ मैसों धै बात करण लागौ, तब उनुकै मालुम चलौ कि उ यहूदी छु। और उनुल वीक बात अणसुणी करिबेर द्वी घन्ट तलक जोर-जोरल यौ नॉर लगाई, "इफिसीक अरतिमिस जिंदाबाद! इफिसीक अरतिमिस जिंदाबाद!" आखिरकार उ नगरक सैपल भीड़ कै शांत करिबेर कौ, "भाइयो, यौ बात कै को नि जाणन कि इफिसुस नगरकि अरतिमिस देवी महान छु और हम मंदिर और अगाश बे छुटी वीक मूरतिक हिफाजत करणी छूं? यैक लिजी कि यौ बात सांचि छु, तुमुकै शांत है जाण चैं और बिन सोच-समझियै के नि करण चैन। तुम जनुकै पकड़िबेर यां ल्यै राछा, उनुल न तो मंदिर बे चोरि करी, और न हमेरि देवीक बुराइ करी। अगर देमेत्रियुस और वीक कारीगरों कै इनुबे के शिकायत छु, तब यैक लिजी अदालत खुली छु। और अगर तुम के और चांछा, तब यैक लिजी भली कैबेर मैसोंक बैठक करो। आजक हाल्ल-गुल्लक कारणल रोमी सरकार हमुकै परेशान करि सकुं, किलैकि हम उनुकै यैक के कारण नि बतै सकन।" यौ सब कैबेर वील सब मैसों कै वांबे भेजि दे।

## त्रोआस मिं पौलुसक अद्भुत काम

(प्रेरितो २०:१-१२)

यौ हाल्ल-गुल्ल खतम हुणक बाद पौलुसल सब विश्वासियों कै बुलैबेर उनेरि हिम्मत बढ़ै। फिर उनुबे विदा लिबेर मकिदूनिया न्है गोय। और फिर वील पुर प्रदेशक दौर करौ, और उपदेश दी-दिबेर विश्वासी मैसों कै हिम्मत दिने, उ दक्षिण दिशा मिं यूनान देश पुजौ। और वां तीन म्हैण बितूणक बाद उ समुद्रक पार सीरिया देश जाणी छी। पर जब उकै यौ पत्त चलौ, कि थ्वाड़ यहूदी मैस मिं सफरक बीच मिं मारणक लिजी मशौद करणई, यैक लिजी वील मकिदूनियाक बॉट वापिस लौटणक फैसाल करौ। तिमोथी और थ्वाड़ दुसॉर मैस लै वीक दगाड़ छी। तब हमुल फसहक त्यारक बाद फिलिप्पी नगर बे समुद्रक बॉट आपण सफर शुरु करौ और पांच दिनोंक बाद हम त्रोआस नगर मिं पुज्यूं। वां हम सात दिन तलक रयूं।

पौलुसक यांबे जाणक पैल ब्याव हम यीशुक यादगारिक भोजन खाँणक लिजी एक भवनक तिमंजल मिं जॉम हयी। किलैकि पौलुस दुसर दिन यांबे जाणिवॉल छी, यैक लिजी उ अधरात तलक वां परचार करनै रौ। और वां यूतुखुश नामक एक लौंड खिड़कि मिं बैठि रौछी। जब पौलुस अधरात तलक बातै करण मिं छी, उ लौंड कै नीन ऐ गेई, और उ नीन मिं तेलि छुटिबेर मरि गोय। यौ देखिबेर पौलुस तेलि आ और उकै आपण गव लै लगैबेर सबों धै कौ, "झन डरो, यौ दुबार ज्यून है गो।" यैक बाद पौलुसल मेलि जैबेर र्वट लिबेर खा। फिर उ उज्याव हुण तलक परचार करनै रौ। और यौ बीच मिं उ लौंड कै मैस ज्यूनै घर ली आई, यैल उनुकै भौत तसल्ली है।

## इफिसियोंक लिजी पौलुसक विदाइक भाषण

(प्रेरितों २०:१३-३८)

यैक बाद पौलुसल हमुधै कौ, "तुम जहाजल जाओ और मी वां तलक हिटबेर ऊल।" और अस्सुस पुजणक बाद जब पौलुस लै वां पुजौ तब हमुल उकै लै आपण दगाड़ जहाज मिं भैटै ले। फिर हम मितुलेने मिं आई। यैक दुसर दिन हम खियुस द्वीप पुज्युं। तिसर दिन हम समुद्र पार करिबेर सामोस द्वीप, और चौथू दिन मिलेतुस नामक बन्दरगाह मिं आयुं। पौलुसल इरॉद करि राँखछी कि हम सब इफिसुस कै छोड़िबेर अघिल न्है जूल ताकी हम पेंतेकुस्तक त्यारक दिन यरुशलेम पुजि सकूं। यैक लिजी वील मिलेतुस बे जबाब भेजिबेर इफिसुसॉक विश्वासियोंक समुदायक अधिकारियों कै वां बुलवा।

और उनर वां पुजण पर उनुधै कौ, "तुम सब जाणछा कि जदिन बे मी पैल बार यां आई, उ दिन बे म्यर चाल-चलन कस रौ। मील परमेश्वरक सेवा दीनताल करी। और जो दुःख-मुशीबत यहूदियोंक मसौदोंक कारणल मि पर आई, उ सब सहण करी। और तुमर भलाइक जो-जो बात छी, उनुकै मील तुमुकै बतूण मिं कभै के झिझक नि कर। और सबोंक घर-घर जैबेर लै उ बातोंक बारि मिं बतूनै रयुं। मी यहूदी और दुसॉर सब मैसोंक सामण साफ-साफ गवाही दिनै रूछी, कि उं लै आपण मन फिराव करिबेर परमेश्वरक सामण ऐ जाओ और हमर प्रभु यीशु मिं भरौस करो। ऑब मी पवित्र-आत्माक कूणल यरुशलेम जाणयुं, और मी नि जाणन कि वां म्यर दगाड़ के हवल। बस इदुकै जाणनू कि हरेक नगर मिं पवित्र-आत्मा मिं खबरदार करणै, कि वां जंजीर और दुःख म्यर इंतजार करणई। पर मेरि नजर मिं मेरि जिन्दगीक के

कीमत नहैं, मी बस यौ काम पुर करण चानू जो प्रभु यीशुल मिक्कें सौप रॉखौ, कि मी वीक दयाक बारि मिं गवाही दिनै रूं।

मी तुमर बीच मिं रैबेर तुमुकें परमेश्वरक राज्यक बारि मिं बतूनै रयूं। पर आँब मी जाणनू कि हमेरि भेट नि हो। यैक लिजी मी तुमुधैं कूणयूं कि अगर तुमुमिंबे क्वे लै यीशु मिं भरौस नि करणक कारणल नांश हो, तब मी यैक जिम्मेदार न्हैंतियूं। किलैकि मील भौत मेहनतल तुमुकें परमेश्वरक पुरि बात बतै रॉखी। यैक लिजी तुम आपण और सॉर दलक लिजी खबरदार रवो। पवित्र आत्माल तुमुकें आपण दलक देख-भाल करणकि जिम्मेवारि दी रॉखी। तुम यौ काम भली कै करिया, किलैकि परमेश्वरल उनुकें आपण च्यलक खून दिबेर छुड़ै रॉखौ। मी जाणनू कि म्यर जाणक बाद बदमाश मैस तुमर बीच मिं आल और तुमुमिं के दया नि करो। और तुमर दल मिंबे लै यॉस मैस निकलॉल जो विश्वासियों कें भड़कैबेर उनुकें गलत-गलत शिक्षा द्याल। यैक लिजी चौकस रओ, और यौ लै याद धरिया कि मी तीन साल तलक भौत मुशीबतल यौं बातोंक लिजी तुमुकें दिन-रात खबरदार करनै रयूं। आँब मी तुमुकें परमेश्वरक हातों मिं सौपनू। और उनर बचन मिं भरौस करनू कि उनेरि दया और माफिल तुमर भरौस बढ़नै रवो, और तुम उनर सब चुनी मैसोंक दगाड़ परमेश्वरक राज मिं पुजि सको। मील कभै कैकै सुन, चाँदि और लुकुड़ोंक लोभ नि कर। तुम सब जाणछा कि मील आपण और आपण दगडुवोंक जरूवतों कें पुर करणक लिजी खुद काम करौ। मील हमेशा तुमर सामण यौ उधारण धरौ, कि हमुकें खुद काम करिबेर दीन-दुखियोंक मधत करण चैं। और तुम प्रभु यीशुक यौं बातों कें लै याद धरिया, "लिण हबेर, दिण जादे भल छु।"।

यौं सब बातोंक बाद पौलुसल उनर दगाड़ घुन टेकिबेर प्रार्थना करी। यैक बाद उं सब मैसोंल पौलुस कें अडाव खितिबेर डाड़ मारनै उकें प्यार करण लागीं। उं सब मैस जादे दुःखी यौ कारणल हई कि उं यैक बाद पौलुस कें फिर कभै नि देखि सकॉल। फिर उं सब मैस पौलुस कें विदा करणक लिजी पाणिक जहाज तलक गई।

## पौलुस यरुशलेम जाणौ

(प्रेरितों २१:१-१७)

इफिसुसॉक मैसों बे विदा लिणक बाद हम कोश द्वीप पुज्यूं। और वांबे दूसर दिन हम रुदूस द्वीप आयूं, और फिर वांबे पतारा नगर गोयूं। पतारा नगर



मिं हमुकै फीनीके इलॉकक तरफ जाणी जहाज मिलौ और हम उमिं भैबेर न्है ग्याय। फिर हमुल कुप्रुस द्वीप देखौ, पर हम उकै बाँ तरफ छोड़िबेर अघिल कै सीरियाक तरफ बढ़ ग्याय। और फिर सोर नगर मिं उतरयूं, किलैकि यां जहाज बे माल लै उतारण छी।<sup>14</sup> वां हमुल विश्वासियोंक पत्त-पाणि लगैबेर सात दिन उतर दगाड़ रयूं। उनुल पवित्र आत्मा ल भरिबेर पौलुस धै कौ, "तुम यरुशलेम नि जाओ!" पर पौलुसल उनेरि बात नि मानि।

और जब यौं सात दिन पुर हई, और हम उनुबे विदा लिबेर वांबे जाणी छी, तब सब मैस नॉनतिनोंक दगाड़ हमुकै पुज्यूनक लिजी नगर बे भ्यार तलक आई। फिर हमुल समुद्रक किनार मिं घुन टेकिबेर प्रार्थना करी। यैक बाद उं हम सबों कै समुद्री जहाज मिं बैठैबेर आपण घर लौट ग्याय। जब हम सोरक बाँट पतूलीमिस नगर पुज्यूं, तब हम एक दिन विश्वासियोंक दगाड़ रयूं। दुसर दिन हम वांबे जैबेर कैसरिया पुज्यूं। वां हम भलि खबरक परचार करणी फिलिप्पुसक घर मिं रयूं। उ सात मैसों मिंबे एक छी, जनुकै खॉण बाँटणक लिजी यरुशलेम मिं छाँटि रॉखछी। वीक चार अणब्यवाई चेली छी, जो परमेश्वरक बात बतूछी।

जब हमुकै वां थ्वाड़ दिन है ग्याछी, तब अगबुस नामक नबी यहूदा प्रदेश बे वां आ। वील पौलुसक झाड़नल आपण हात-खुट बादिबेर कौ, "जो मैसक यौ झाड़न छु उकै यरुशलेम मिं यहूदी मैस इसकै बादिबेर अन्य जातियोंक हात मिं सौपॉल।" यौ बात सुणिबेर हम और वांक मैस सबोल पौलुस धै बिनती करिबेर कौ, "तुम यरुशलेम नि जाओ!" लेकिन पौलुसल कौ, "तुम यौ के कूणाछा? तुम डाड़ मारि-मारिबेर मिंके निराश किलै करणाछा? मी प्रभु यीशु मसीक नामल यरुशलेम मिं न केवल बादीणक लिजी पर मरणक लिजी लै तैय्यार छूं।" और जब पौलुस हमेरि बात मानणक लिजी तैय्यार नि हाय, तब हम यौ कैबेर चुप है ग्याय कि प्रभुक मंशा पुर हो।

यैक बाद हम तैय्यारी करिबेर यरुशलेमक तरफ बाँट लागीं। कैसरियाक थ्वाड़ विश्वासी हमर दगाड़ लै आई और जब हम यरुशलेम पुज्यूं, तब उं हमुकै कुप्रुसक रुणी मनासोनक घर ली गेई, जो शुरुवादक दिनोंक विश्वासी छी। और वां हमर स्वागत सब विश्वासियोंल खुशील करौ।

14 सीरिया, इस्रायल देश बे उत्तरक तरफ छु।

## पौलुसक यरुशलेम मिं विश्वासियोंक दगाड़ भेट

(प्रेरितों २१:१८-२६)

दुसर दिन पौलुस और हम सब याकूबक घर गोयूं, जां विश्वासियोंक सब अधिकारी जाँम छी। पौलुसल उनुकें उ सब बता जो परमेश्वरल वीक जरियल अन्य जातियोंक बीच मिं करछी। यौ सब बातों कें सुणिबेर उनुल परमेश्वरक महिमा करी। और पौलुस धै कौ, "हजारों यहूदियोंल विश्वास लै करि है, और उं सब नीमोंक पालन लै पक्क रीतील करनी। पर उनुल तुमर बारि मिं सुण राँखौ, कि तुम दुसॉर देशों मिं रुणी यहूदियों धै कूँछा, कि तुम मोशेशक नीमों कें मानण छोड़ि दियो, और न आपण च्यालोक खतना करो और न यहूदियोंक रीती-रिवाजों कें मानो। आँब तुम उनुकें शांत करणक लिजी यस करो। हमर बीच मिं चार मैस छन, जनुल दुबार शुद्ध हुणक रीती करण छु। तुम लै इनर दगाड़ परमेश्वरक भवन मिं जैबेर यौ रीती करो और इनर खर्च लै उठाओ, जैल सबों कें पत्त चल जॉल कि तुम लै मोशेशक नीमों कें मानछा। जां तलक अन्य-जातियोंक विश्वासियोंक बात छु, हमुल चिट्ठी लिखबेर उनुकें आपण यौ फैसॉल भेजि है कि तुम मूरतियोंक सामण चढाई शिकार, खूनक खॉण-पिण, दम घोटी जानवरोंक शिकार और व्यभिचार बे बचो।" तब पौलुसल जस उनुल कौ, उसै करौ।

## पौलुस पकड़ी जां

(प्रेरितों २१:२७-४०)

यैक एक हफतक बाद पौलुस शुद्ध हुणक रीती पुर करणक लिजी बलिदान चढणक लिजी परमेश्वरक भवन मिं गो। लेकिन जब आँशियाक थ्वाड़ यहूदियोंल पौलुस कें देखौ, तब उं नराज हबेर जोर-जोरल कूण लागी, "भाइयो, आओ! यौ वी मैस छु, जो सब जाँगोंक मैसों मिं यौ बातक परचार करुं, जो हमर जात, नीम और यौ परमेश्वरक भवनक लै खिलाफ छु! केवल इदुकै नै, यैल यूनानियों कें यौ भवन मिं लैबेर यैक पवित्रता लै नांश करि है!" उनुल इफिसुसक रुणी तोफिमुस कें पौलुसक दगाड़ यौ नगर मिं देखि राँखछी, यैक लिजी उनुल यौ गलत समझौ कि पौलुस उकें आपण दगाड़ लिबेर परमेश्वरक भवन मिं आ।

यौ बातक कारणल पुर शहर मिं हड़कंप मचि गई, और मैस चारों तरफ बे दौड़बेर वां जाँम है ग्याय। और उं पौलुस कें पकड़िबेर परमेश्वरक भवनक

भ्यार बे खींच ल्याई। उं पौलुसक खून करणयै छी कि उ बखतै रोमी सेनाक सैप कैं यौ खबर मिली कि सॉर यरुशलेम मिं उत्पात मचि रौ। उ तुरंत सिपैनों कैं लिबेर भीड़क तरफ दौड़ पड़ौ। जब मैसॉल सेनाक सैप और सिपैनों कैं देखौ, तब उनुल पौलुस कैं मारण बन्द करि दे। फिर सेनाक सैपल नजिक ऐबेर पौलुस कैं पकड़िबेर उकैं द्वी जंजीरोंल बादणक हुकुम दिबेर मैसों धैं पुछौ कि यौ को छु? और यैल के करौ? भीड़ मिंबे क्वे के कूणौछी और क्वे के। यौ कारणल सेनाक सैप कैं ठिक-ठिक बातक मालुम नि चल सक, यैक लिजी वील सिपैनों कैं पौलुस कैं सेनाकि चौकि मिं ली जाणक हुकुम दे।

जब उं वांक सीढ़ियों मिं पुर्जी, तब भीड़क खतरनाक माहौल देखिबेर सिपैनों कैं पौलुस कैं उठैबेर ली जाण पड़ौ। और भीड़, "मारो, मारो!" कैबेर हकाहाक करनै वीक पछिन-पछिन बे उपैछी।

जब सिपै पौलुस कैं सेनाकि चौकि भितेर ली जाणाछी, तब पौलुसल सेनाक सैप धैं कौ, "के मी तुमुधैं एक गुजारिश करि सकनू?" यौ सुणिबेर वील कौ, "के तुम यूनानी भाषा जाणछा? के तुम उ मिस्री न्हैंतिया जैल थ्वाड़ बखत पैली झगड़ फसाद करछी और चार हजार मैसों कैं तलवार लिबेर भड़कैबेर रेगिस्तान मिं ली गोछी?" पौलुसल कौ, "ना, ना, मी यहूदी छूं, और तरसुस नगरक रुणी छूं। मी क्वे यस-उस नगरक रुणी न्हैंतियूं। मेरि गुजारिश छु, कि तुम मिक्कैं भीड़क दगाड़ बात करणक मंजूरी दियो।"

वील मंजूरी दी दे, फिर पौलुसल सीढ़ियों मिं ठाँड़ हबेर हातल मैसों कैं चुप रुणक इशॉर करौ, और जब सब चुप है ग्याय, तब पौलुस उनुधैं इब्रानी बोलि मिं बात करण लागौ।

## पौलुसक भाषण

(प्रितों २२:१-२१)

पौलुसल मैसों धैं कौ, "भाइयो, मेरि बात सुणो।" और जब मैसॉल सुणौ, कि उ हमेरि बोलि मिं बुलाणौ, तब उं सब शांत है ग्याय।

पौलुसल कौ, "मी लै यहूदी छूं, और म्यर जनम किलिकियाक तरसुस नगर मिं हौ। लेकिन मेरि पढ़ाइ-लिखाइ यौ नगरै मिं है, और मील आपण पुरखोंक सब नीमों कैं भली कै समझौ। म्यर भितेर लै तुमरै चारि परमेश्वरक आदर करणक लिजी आंग लागीं छु। उ मैसों कैं जो यीशु कैं मानछी, मील उनुकैं बन्दी बणैबेर जेल मिं खितछी। यैक गवाह महायाजक और सभाक मैस छन, किलैकि मील उनुधैं यौ हुकुम-नाम लिखिबेर ली राखछी, कि

दमिश्क मिं जो लै यीशुक विश्वासी हवाल, मी उनुकें जेल मिं खितिबेर सजा दिलूल। जब मिं हुकुम-नाम लिबेर दमिश्कक तरफ जाणौछी, तब एकाएक अगाश बे एक उज्याव म्यर चारों तरफ चमकौ। मी भिं मिं छुटि गोय, तब मील यौ अवाज सुणी, "पौलुस, पौलुस, तु मिक्कै किलै सत्यूणौछै?" मील कौ, "प्रभु, तुम को छा?" उनुल कौ, "मी यीशु छूं, जकै तु सत्यूणौछै" जो म्यर दगाड़ छी, उनुल उज्याव देखौ, पर उ अवाज नि सुणि जो मील सुणी। फिर मील कौ, "प्रभु, मी के करुं?" प्रभुल मिधै कौ, "उठ, दमिश्कक तरफ जा, और वां तुकै बताई जाल कि के करण छु।" यैक बाद म्यर दगाड़ु मिक्कै दमिश्क ली गई, किलैकि तेज उज्यावल मिक्कै के नि देखीणौछी। तब हनन्याह नामक धार्मिक मैस जो यहूदियों मिं जानी-मानी छी, वील म्यर पास ऐबेर मिधै कौ, "पौलुस भाइ, तु देखण भै जा।" उ बखत बे मी फिर देखण भै गोय। फिर वील मिधै कौ, "परमेश्वर जनेरि अराधना हमार पितर करछी, उनुल तुकै यैक लिजी छाटि रॉखौ, कि तु उनेरि मंशा कैं जाणो, और मसीह कैं देखिबेर वीक बातों कैं सुणो। किलैकि तु सब मैसोंक सामण उनर लिजी यौ बातोंक गवाह छै जो त्वील देख-सुण रॉखीं। यैक लिजी आँब तु पाणिक-बपतिस्मा लिणक लिजी ढील नि कर, और उनुधै प्रार्थना करिबेर आपण पापों कैं ध्वे ले।"

यैक बाद जब मी एक दिन यरुशलेम जैबेर परमेश्वरक भवन मिं प्रार्थना करणौछी, उ बखत मिक्कै प्रभुल दर्शन दे। उनुल कौ, "उठ, यांबे जा, किलैकि यांक मैस तेरि बात नि मानन।" मील कौ, "प्रभु, उं खुद जाणनी कि मी तुमार मैसों कैं सभा-घरों बे निकाल-निकालिबेर जेल मिं खितिबेर मारछी। और जब तुमर सेवक स्तिफनुस मारी जाणौछी, तब मी उनर दगाड़ वै छी, मील उनार लुकुड़ पकड़ि रॉखछी, जो स्तिफनुस कैं मारणाछी। यैक लिजी मैस मेरि बात जरूड़ मानाल।" लेकिन प्रभुल मिधै कौ, "यांबे जा, किलैकि मी तुकै दूर-दूर तलक दुसॉर जातियोंक पास भेजणी छूं।"

## पौलुसकि रोमी नागरिकता

(प्रेरितों २२:२२-३०)

जब पौलुसकि यौ बात मैसोंल सुणी कि आँब मिक्कै अन्य जातियोंक पास जाण छु, तब उं सब जोर-जोरल हकाहाक करिबेर कूण लागीं, "यकै मारि दियो! यौ ज्यून रुणक लैक न्है! यकै मारि दियो!" और उं आपण लुकुड़ फाड़िबेर अगाश हुं मॉट छलकूण लागीं।

तब सेनाक सैपल पौलुस कै भितेर लिजैबेर चाबुक लगूणक हुकुम दे, जैल उ आपण कसूर बताओ। किलैकि उ जाणन चांछी कि मैस उकें देखिबेर इदुक नराज किलै है रई। जब सिपै पौलुस कै चाबुक लगूणक लिजी बादणाछी, तब पौलुसल उधैं पुछौ, "के तुमर कानूनक अनुसार क्वे यस मैस कै चाबुक लगै सकछा जो कि रोमी नागरिक हो, और जबकि वीक कसूर लै साबित नि हई हो?" यौ सुणिबेर उ सिपैल सेनाक सैपक पास जैबेर कौ, "तुम यौ के करणाछा? उ तो रोमी छु!" यौ सुणिबेर ठुल सैपल पौलुसक पास ऐबेर उधैं पुछौ, "बता, के तु रोमी छै?" वील जबाब दे, "होय।" तब सेनाक सैपल कौ, "मिकें रोमी नागरिकता घूस मिं भौतै डबल दिबेर मिली।" पौलुसल कौ, "मी तो जनम बे रोमी छूं!" तब उं सिपै जो पौलुस कै मारणिवॉल छी, हट गया। और सेनाक सैप लै डरि गोय, किलैकि वील एक रोमी मैस कै बादणक और चाबुक लगूणक हुकुम देछी।

## पौलुस महा-सभाक सामण

(प्रेरितों २३:१-११)

यैक दुसर दिन सेनाक सैपल यहूदियोंक अधिकारियों कै आपण दगाड़ बुलवैबेर पौलुस कै उनर सामण ठाँड़ करौ, ताकी उ जाणि सको कि मैस वीक खिलाफ हाल्ल किलै मचूणाछी। पौलुसल सभाक तरफ चैबेर कौ, "भाइयो, मील आज तलक परमेश्वरक सामण आपण सांचि मनल हरेक काम करौ।" यौ सुणिबेर हनन्याह महायाजकल पौलुसक मूख मिं चैंट मारणक हुकुम दे। तब पौलुसल उधैं कौ, "ओ कपटी, परमेश्वर तुकें मारॉल! तु यां व्यवस्थाक अनुसार न्याय करणक लिजी बैठि रौछै, फिर लै व्यवस्थाक खिलाफ मिकें चैंट मारणक हुकुम किलै दिणौछै?"

तब सामणी ठाँड़ थ्वाड़ मैसोल पौलुस धैं कौ, "के तु परमेश्वरक महायाजक कै जे ते कूणौछै?" पौलुसल कौ, "भाइयो, मिकें पत्त नि छी, कि यौ महायाजक छन। और लिख रॉखौ, कि तुम आपण मैसोक न्याय करणी कै नक-भल नि कया।"

जब पौलुसल देखौ कि यां एक दल सदूकियोंक और दुसर फरीसियोंक दल छु, तब वील जोरल कौ, "भाइयो, मी फरीसी दलक धर्म गुरु छूं, जस म्यर पितर लै छी। मिकें यैक लिजी पकड़ी गो, किलैकि मी माननू कि मरणक बाद हम दुबार ज्यून हूंल!" पौलुसक यौ कूण तलकै सदूकियों और फरीसियोंक बीच बहस शुरु है गोय, किलैकि सदूकी दुबार ज्यून हुण, स्वर्गदूत, और आत्मा के नि मानछी, लेकिन फरीसी यौ सब बातों कै मानछी।

जब उनुमिं फूट पड़ि गई, तब फरीसी दलॉक थ्वाड़ मैसॉल बहस करन-करनै कौ, "हम यैक क्वे कसूर नि देखणाय! अगर क्वे आत्मा या स्वर्गदूतल यैक दगाड़ बात करी, तब हम वीक खिलाफ के बात नि करि सकन।"

यौ देखिबेर कि उं भौत जादे बहस करणई, सेनाक सैप डरि गोय कि कैं उं पौलुसॉक टुकूण-टुकूण नि करि दियो। यैक लिजी वील सपैनों कैं हुकुम दे कि तुम जबरन सभा मिं जैबेर पौलुस कैं सेनाक चौकि मिं ली जाओ।

यौ रातै प्रभु परमेश्वरल पौलुस धैं बात करिबेर कौ, "तु नि डर, किलैकि जसिकै त्वील यरुशलेम मिं गवाही देखी, उसिकै तुमुल रोम मिं लै गवाही दिण छु।"

## पौलुस कैं मारणक मशौद

(प्रेरितों २३:१२-२२)

दुसॉर दिन चालीस है जादेक यहूदियोंल जॉम हबेर यौ कसम खै कि जब तलक हम पौलुस कैं नि मारि द्यूं, तब तलक हम थूक लै नि नेऊं। और इनुल याजकोंक सैपों और सभाक खाश मैसोंक पास जैबेर उनुधैं कौ, "हमुल यौ कसम खै रॉखी, कि जब तलक पौलुस कैं मारि नि द्यूं, तब तलक के नि चाखुंल। यैक लिजी ऑब तुम सेनाक सैप कैं समझैबेर पौलुस कैं यौ बहानल आपण पास बुलवाओ कि तुम वीक ठिक-ठिक पुछ-ताछ करण चांछा। तब बाँट मिं हम उकै मारणक लिजी बैठि रूँल।" लेकिन पौलुसक भाणजल उनेरि सब बात सुणी, और वील चौकि भितेर ऐबेर पौलुस कैं सब बात बतै।

यैक बाद पौलुसल हौलदार कैं बुलैबेर उधैं कौ, "यौ च्यल कैं सैपक पास ली जाओ, किलैकि यौ उनुकै के बतूण चां।" तब वील उकै सैपक पास लिजैबेर कौ, "पौलुस कैदील मिकै आपण पास बुलैबेर मिधैं विनती करिबेर कौ, कि यौ च्यल कैं मी तुमर सामण पुजै द्यूं, किलैकि यौ तुमुकै के बात बतूण चां।" तब सैप वीक हात पकड़िबेर अलग ली गो, और उधैं पुछौ, "तु मिकै के बतूण चांछै?" वील कौ, "यहूदी एक हबेर तुमुधैं यौ मांग करण चांनी, कि तुम पौलुस कैं भोव सभाक सामण ल्याओ, कि उं उधैं फिर पुछ-ताछ करि सको। लेकिन तुम उनेरि बात नि सुणया, किलैकि उनुमिं बे चालीस है जादे मैसॉल पौलुस कैं मारणकि कसम खै रॉखी, कि जब तलक उं उकै नि मारि लिन, तब तलक उं के नि चाखॉल, और उं तुमर होइक इंतजार मिं छन।" यौ सुणिबेर सैपल उ च्यल कैं यौ कैबेर भेजि दे, "तु कैकणी झन बताये, कि त्वील यौ बात मिकै बतै।"

## पौलुस कै फेलिक्सक पास भेजण

(प्रेरितों २३:२३-३५)

यैक बाद सैपल द्वी हौलदारों कै आपण पास बुलवैबेर उनुधैं कौ, "आज रात नौ बाँजी कैसरिया नगर जाणक लिजी द्वी सौ सिपै, द्वी सौ भॉल और सत्तर घुड़सवार तैय्यार करो। और पौलुस कै घवड़ मिं बैठैबेर उकैं राजपाल फेलिक्सक पास ली जाओ।" यैक अलावा सैपल एक यौ चिट्ठी लेखी,

"महारॉज राजपाल फेलिक्स कै, क्लौदियुस लूसियासक पैलाग। मी यौ पौलुस नामक मैस तुमर पास यैक लिजी भेजनू, कि तुम वीक न्याय करो। जब यहूदी यौ मैस कै पकड़िबेर मारणाछी, तब मील यौ जाणिबेर कि यौ एक रोमी छु, यकैं छुड़ैबेर यां ल्यायूं। फिर यौ पत्त लगूणक लिजी कि उं यैमिं दोष किलै लगूणई, मी यकैं उनर सभा मिं लिबेर गोयूं। तब मिंकेँ मालुम चलौ कि उं यैमिं आपण नीमोक क्वे बातोंक कारणल दोष लगूणई, लेकिन वील यस क्वे कसूर नि करि रॉख, जैक लिजी उकैं मौतक सजा या बन्दी बणाई जाओ। यैक बाद जब मिंकेँ पत्र चलौ कि उं यकैं मारणक मशौद करणई, तब मील यकैं जल्दी तुमर पास भेजौ। और यैमिं दोष लगूणियों कै लै हुकुम दे कि उं तुमर सामण ऐबेर यैमिं दोष लगाओ।"

सिपैनोंल उस्सै करौ, जस उनुकैं हुकुम दी रॉखछी। उनुल रातों-रात पौलुस कै अंतिपत्रिस तलक पुजा, और दुसॉर दिन पौलुस कै अघिल ली जाणक लिजी घुड़सवारों कै छोड़िबेर उं वापिस चौकि मिं आई। यैक बाद घुड़सवारोंल कैसरिया पुजिबेर राजपाल कै चिट्ठी दे, और पौलुस कै उनर सामण ली गई।

राजपालल चिट्ठी पढ़िबेर उधैं पुछौ, "तु को राज्यक छै?" तब पौलुसल जबाब दे, "मी किलिकिया प्रदेशक छूं।" राजपालल कौ, "जब तुमिं दोष लगूणी ऐ जॉल, तब मी त्यर सुणवाइ करुंल," और वील यौ हुकुम दे कि यकैं कैद मिं धरी जाओ।

## पौलुस राजपालक सामण

(प्रेरितों २४:१-२७)

यैक पांछ दिनक बाद महायाजक हनन्याह और थ्वाड़ सभाक खाश मैस तिरातुल्लुक नामक एक वकील कै लिबेर आई। और वील राजपालक सामण पौलुस मिं यस कैबेर दोष लगा, "महारॉज, तुमर कारणल हमर देश

मिं बड़ शांति छु। और देश मिं सुधार लै करी जाणई। और हम सब यौं बातों कैं मानिबेर तुमर धन्यवाद करनू। और आँब हम तुमर जादे बखत बरबाद नि करण चान। यैक लिजी हम तुमुधैं गुजारिश करनू कि किरपा करिबेर तुम हमुकैं आपण बात कूणक मौक दियो। बात यौ छु कि हकीकत मिं यौ मैस फूट पाड़णी और उपन्यांसि छु। और यैल दुनियाँक सब यहूदियों मिं फूट पाड़ी, और यौ नासरत मिं रुणी यीशु कैं माननी वॉलोक ठुल नेता छु। इदुकै नै, यां तलक कि यैल परमेश्वरक भवन कैं लै अशुद्ध करण चा। अगर तुम खुद यैक पत्त-पाणि करला, तब तुमुकैं लै यौं सब बातोंक यकीन है जॉल।" तब उनर अलावा यहूदियोंल लै कौ, "होई, यौ सब बात सांचि छु।"

यैक बाद राजपालल पौलुस कैं बुलाणक लिजी इशॉर करौ। पौलुसल कौ, "यौ जाणिबेर कि तुम भौत सालों बे यौ जातिक न्याय करणाछा, यैक लिजी मी खुशि हबेर आपण बारि मिं सफाइ दिणयूं। तुम खुद यौं बातोंक ठिक-ठिक पत्त करि सकछा कि मिंकैं परमेश्वरक अराधना करणक लिजी यरुशलेम जाई कुल बार दिन हैराछी। और इनुल मिंकैं नै परमेश्वरक भवन मिं, नै नगर मिं कैकै दगाड़ बहस करण और यां तलक कि दंग करूण मिं ल्यै नि द्यख। और नै यौ उं दोषों कैं, जो मी मिं लगूणई, तुमर सामण यां साबित लै नि करि सकन। मी आपण पुरखोंक परमेश्वरक सेवा करनू और जो यहूदियोंक शास्त्र मिं लेखी छु, मी उं सब बातों मिं विश्वास लै करनू। लेकिन जकै यौ गलत शिक्षा समझनी, मी उकैं सच्च माननू। मी परमेश्वर मिं भरौस धरनू, जस यौ खुद धरनी कि धर्मी और अधर्मी द्विवै मरियक बाद दुबार ज्यून जरूड़ हवाल। यैक लिजी मी परमेश्वर और मैसोंक सामण हमेशा आपण मन कैं पवित्र करणक कोशिश करनू। ऐल मी भौत सालोंक बाद डबल लिबेर आपण मैसोंक मधत करणक लिजी यरुशलेम ऐ रौछी, और बलिदान चढूणक लिजी लै। और जब परमेश्वरक भवन मिं इनुल मिंकैं देखौ, उ बखत मी नीमक अनुसार शुद्ध हबेर बिन भीड़-भाड़ और दंग करियै आपण बलिदान चढूणक काम करणौछी। पर वां थवाड़ आँशियाक यहूदी मैस छी, जनुल मिंकैं पकड़ि ले। अगर उनर पास मी मिं दोष लगूणक लिजी के कारण हुंछी, तब उं यां तुमर सामण किलै नि आय! नतेरि यौ खुद बताल कि जब मी महा-सभाक सामण ठाँड़ छी, तब उनुल मी मिं के दोष पा। केवल यौ बात कैं छोड़िबेर जो मील उनर सामण कै, "मरियोंक दुबार ज्यून हुणक बातल म्यर फैसॉल तुमर सामण हुणौ।"



तब राजपालल, जो यीशु मिं भरौस धरणियोंक बारि मिं भली कै जाणछी, वील सुणवाइ रोकिबेर कौ, "जब सेनाक सैप लूसियास आल, तब मी तुमर मुकरदमक फैसाल करुल।" तब वील पौलुस कै थ्वाड़ छूट दिबेर हिरासत मिं धरणक हुकुम दे, और यौ ले कौ, "वीक दगडुवों कै वीक दगाड़ भेट करण दिया और वीक सेवा करणक लिजी मना नि करिया।"

यैक थ्वाड़ बखत बाद फेलिक्स आपणि स्यैणि द्रुसिल्ला जो यहूदी छी, उकै आपण दगाड़ लिबेर दरबार मिं आ, और पौलुस कै बुलवैबेर उनुल यीशु मसीक बारि मिं सुणौ। जब उ भलाइक काम, आपण कै पाप करण बे रोकणकि ताकत और परमेश्वरक न्यायक बारि मिं बात करणौछी, उ बखत फेलिक्सल डरिबेर कौ, "तु ऐल जा, जब टैम मिलल, तब मी फिर तुकै बुलवै ल्यूल।" दगाड़-दगाड़ै उ पौलुस धैं रुपै पाणक आँश लै करछी। यैक लिजी उ उकै बार-बार बुलवैबेर वीक दगाड़ बात-चीत करछी।

इसिकै द्नी साल बित गया। यैक बाद फेलिक्सक बदाव मिं फेस्तुस राजपाल बनौ। फेलिक्सल यहूदियों कै खुशि करणक मंशाल पौलुस कै जेल मिं खिति देछी।

## रोमी सम्राट धैं पौलुसकि अपील

(पेरितों २५:१-१२)

राजपाल फेस्तुस कैसरिया मिं उणक तीन दिन बाद यरुशलेम गो। वां याजकोंक सैपॉल और यहूदियोंक खाश मैसॉल पौलुस मिं दोष लगैबेर फेस्तुस धैं बिनती करिबेर कौ, "तुम पौलुस कै यरुशलेम भिजवै दियो।" किलैकि उं उकै बाँट मिं मारणक विचार मिं छी। लेकिन फेस्तुसल कौ, "उ कैसरियाक जेल मिं बन्द छु, और खुद मी लै वां जल्दी जाणी छूं। यैक लिजी तुमुमिंबे खाश मैस म्यर दगाड़ हिटो, और अगर वील के गलत काम करि राँखी, तब वां उमिं दोष लगाओ।" तब फेस्तुस आठ-दस दिनक बाद वापिस कैसरिया आ। दुसर दिन दरबार मिं भैबेर वील पौलुस कै सभाक सामण ल्युणक हुकुम दे।

जब पौलुस सभाक सामण आ, तब यरुशलेम बे आइ यहूदियोंल वीक चारों तरफ ठाँइ हबेर यॉस दोष लगाई जनर उनरै पास के सबूत नि छी। तब पौलुसल आपण बचाव मिं कौ, "मील न तो यहूदियोंक नीमों कै टोड़ौ, न परमेश्वरक भवन कै अशुद्ध बणा, और न सम्राटक खिलाफ के बात कै।"

तब फेस्तुसल यहूदियों कै खुशि करणक मंशाल पौलुस धैं कौ, "के तु चांछै कि मी यौं दोषोंक न्याय यरुशलेम मिं करुं?" पर पौलुसल कौ, "मी सम्राटक अदालत मिं ठाँड़ छूँ, म्यर फैसॉल यैं हुण चैं। तुम लै भली कै जाणछा, कि मील यहूदियोंक के लै नि बिगाड़ रॉख। अगर मी दोषी छूँ, और मील मौतक सजाक लैक के कसूर करि रॉखौ, तब मी मरणक लिजी तैय्यार छूँ। लेकिन इनार लगाई दोष एक लै सांचि नहैं। यैक लिजी मिंके क्वे लै इनर हात मिं नि सौप सकन। मी सम्राट धैं अपील करनू!"

तब फेस्तुसल आपण राय दिणिवाँलोक दगाड़ चर्चा करणक बाद पौलुस धैं कौ, "त्वील सम्राट धैं अपील करि रॉखी, आँब तु वीकै सामण ठाँड़ हवलै।"

## रॉज अग्रिप्पाक सामण पौलुसक पेशी

(पेरितों २५:१३-२७)

यैक बाद जब भौत दिन है ग्याय तब रॉज अग्रिप्पा और वीकि बैणि बिरनीकेल कैसरिया मिं ऐबेर फेस्तुस कै पैलाग करौ। जब उनुकैं वां थ्वाड़ दिन है ग्याछी, तब फेस्तुसल पौलुसक मुकरदम रॉजक सामण पेश करिबेर कौ, "यां एक मैस छु, जकैं फेलिक्स छोड़ि जै रौ। और जब मी यरुशलेम मिं छी, तब वां याजकोंक सैप और यहूदियोंक खाश नेताओल वीक खिलाफ दोष लगैबेर बिनती करी कि उकैं सजा दी जाओ। मील उनुकैं जबाब दे, "रोमियोंक यौ नीम छु कि जब तलक दोषी कै उमिं आरोप लगूणियोंक सामण आपण बचाव मिं बुलाणक मौक नि मिलि जाँन, तब तलक उकैं सजाक लिजी नि सौपी जाँन। यैक लिजी जब उं यां आई तब मील दुसरै दिन अदालत मिं उ मैस कै ल्युणक हुकुम दे। तब उमिं आरोप लगूणयोल उमिं याँस क्वे दोष नि लगाय जस मील सोचि रॉखछी। लेकिन उनर मन-मुटाव वीक दगाड़ आपण धर्मक थ्वाड़ बातों कै लिबेर और यीशु नामक एक मैसक कारणल छु जो मरि गो, लेकिन पौलुस वीक ज्यून हुणक दाव करुं। और म्यर समझ मिं यौ नि उणय, कि यौं बातोंक पुछ-ताछ कसिक करि जाओ। यैक लिजी मील उधैं पुछौ, "के तु यरुशलेम जाणक लिजी तैय्यार छै, जां त्यर यौं सब बातोंक फैसॉल करी जाओ?" लेकिन वील यौ अपील करी कि सम्राटकै जरियल म्यर फैसॉल हो, और तब तलक मी यौ जेलै मिं रुं। यैक लिजी मील हुकुम दे कि जब तलक मी उकैं सम्राटक सामण नि भेजुं, तब तलक उ यैं जेल मिं रओ।"

यौ सब बात सुणिबेर अग्रिप्पाल फेस्तुस धैं कौ, "मी यैक बात सुणन चानू।" यैक लिजी जब दुसर दिन अग्रिप्पाल और वीकि बैणि धूम-धामल सेनाक सैपोंक और नगराँक खाश मैसोंक दगाड़ सभा-घर मिं आई, तब फेस्तुसल हुकुम दिबेर पौलुस कैं बुलवा। फिर फेस्तुसल कौ, "महारॉज अग्रिप्पा और सब मैसो, यौ मैस कैं देखो, यैक बारि मिं सब यहूदियोंल यरुशलेम मिं और यां लै जोर-जोरल गुजारिश करिबेर मिधैं कौ, कि यौ मैसक ज्यून रुण आँब ठिक न्हैं। पर मील जाणि है कि यैल मौतक सजाक लैक क्वे कसूर नि करि राँखछी। और यैल खुद सम्राट धैं अपील करि राँखी, यैक लिजी मील यकैं सम्राटक पास भेजण छु। लेकिन म्यर पास यैक बारि मिं सम्राट कैं लिखणक लिजी के न्हैं। यैक लिजी मी यकैं तुम सबोंक, खाश कैबेर रॉज अग्रिप्पा, तुमर सामण ल्यै रयूं कि तुमर सामण पुछ-ताछ करणक बखत मिक्कें लिखणक लिजी के गलती मिलि जाओ। किलैकि मिक्कें यौ ठिक नि लागन कि मी क्वे बन्दी कैं वीक दोषक चिट्ठी तैय्यार करी बिना सम्राटक पास भेजुं।"

## अग्रिप्पाक सामण पौलुसकि बात

(पेरितों २६:१-३२)

यैक बाद रॉज अग्रिप्पाल पौलुस धैं कौ, "त्यर पास आपण बचाव मिं बुलाणक मौक छु।" यौ सुणिबेर पौलुसल आपण बचाव मिं कौ, "हे रॉज अग्रिप्पा, यहूदियोंल मी मिं भौत दोष लगै राँखी, फिर लै मी आपुंकेँ धन्य समझनू कि आज तुमर सामण आपण बचाव मिं बुलाणक लिजी जाणयूं, खाशकर यैक लिजी कि तुम यहूदियोंक सब नीम और विवादों कैं जाणछा। यैक लिजी मी तुमुधैं विनती करनू कि अरामल मेरि बात सुणो। सब यहूदी जाणनी कि मील आपण जिन्दगी जवानी बे आज तलक कसिक बितै, पैली आपण देश मिं और यैक बाद यरुशलेम मिं लै। उं म्यर बारि मिं भौत पैली बे जाणनी, कि मील फरीसी दलक, जो यहूदियोंक सबों है जादे कट्टर दल छु, वीक सदस्य हबेर लै आपण धर्मक नीमोंक पक्क पालन करौ। अगर उ चाओ, तब यौ सब बातोंक गवाही लै दी सकनी। परमेश्वरल हमार पुरखोंक दगाड़ एक वैद करौ और हमार बार गोत्रक मैस यौ वैदक पुर हुणक इंतजार मिं रात-दिन परमेश्वरक सेवा करछी। और म्यर न्याय केवल यैक लिजी करी जाणौ, कि म्यर विश्वास छु कि परमेश्वरल यौ वैद आपण च्यल

यीशुक जरियल पुर करि हैलौ। और यौ बात तुमुकें ठिक किलै नि लागन, कि परमेश्वर मरियों कें दुबार ज्यून करि सकनी?

मील लै पैली यस्सै सोचौ कि नासरत गौक यीशुक खिलाफ भौत-कुछ करण छु। और मील यरुशलेम मिं यस्सै करौ। मील मूख्य याजकों धें लिखत लिबेर भौत पवित्र मैसों कें जेल मिं खिति दे, और जब उनुकें मारणक लिजी मेरि राय मांगी, तब मील होई कौ। और सब सभा-घरों मिं जैबेर उनुकें मरवा और यैक लिजी लै बेबस करौ कि उं सबनक सामण आपण मुखल यीशुक बुराइ लै करो। यां तलक कि मी रीशल उनर पिछ भैरॉक नगरों मिं लै करछी। जब मी मूख्य याजकोंक हुकुम और लिखत पैबेर दमिशक हुं जाणौछी, तब मील दोफरिक बखत बाँट मिं सूरज है लै तेज उज्याव अगाश बे उण देखौ, जो म्यर और म्यर दगडुवोंक चारों तरफ चमकणौछी। और हम सब भिं मिं छुटि पड़यों, तब मील इब्रानी बोलि मिं यौ सुणौ, "पौलुस, पौलुस, तु मिंकें किलै सतूणैछै? जदुक तु मिंकें सतयालै, उदुकै जादे तु परेशान ह्वलै।" फिर मील कौ, "प्रभु, तुम को छा?" प्रभुल कौ, "मी यीशु छूं, जकें तु सतूणौछै। यैक लिजी आँब तु ठाँड़ उठ, मील तुकें यौ इरॉदल दर्शन दे, कि तु म्यर सेवक बणो। और न केवल यौं बातोंक जो तु ऐल देखणौछै गवाह ह्वलै, बल्किन उं बातोंक लै जकें मी दर्शन दिबेर अधिल कै तुकें दिखल। मी तुकें त्यार मैस और अन्य जातियोंक हात बे छुणनै रूल। मी तुकें अन्य जातियोंक पास भेजुल, कि उं अन्यार मिंबे उज्याव मिं, और शैतानक बश मिंबे परमेश्वरक तरफ ऐ सको। जब उं मी मिं भरौस करॉल, मी उनर पापों कें माफ करुल, और उं म्यर पवित्र मैसोंक दगाड़ मिलि जॉल।"

यैक लिजी, हे रॉज अग्रिप्पा, मील उ स्वर्गीय दर्शनक हुकुम नि टॉल। तब पैली दमिशक मिं, फिर यरुशलेम और यहूदियोंक सॉर प्रदेश मिं और यां तलक कि अन्य जातियों कें लै यौ प्रचार करनै रयूं, कि आपण मन फिराव करो, परमेश्वरक तरफ आओ और आज बे भॉल काम करिया। यौ कारणल थ्वाड़ यहूदियोंल मिंकें परमेश्वरक भवन मिंबे पकड़िबेर मारणक कोशिश करी। लेकिन मी परमेश्वरक तरफ बे मधत पैबेर आज तलक ज्यून छूं, यैक लिजी मी नॉन-ठुल सबोंक सामण उनेरि गवाही दिणयूं। जो बात नबी और मोशशल कै रॉखी, कि मुक्तिदाता कें दुःख उठूण पड़ल और मरियों मिंबे दुबार ज्यून हबेर यहूदियों और अन्य जातियों द्विनोकें बताल कि उनुकें मुक्ति कसिक मिलि सकूं, मी बस यै बतूणयूं कि ऐल यौ सब है गो।"

जब पौलुस आपण बचाव मिं यौ सब कूणौछी, तब फेस्तुसल कौ, "पौलुस, के तु पागल छै, त्यर जादा ज्ञान तुकें पागल बणूणौ!" लेकिन पौलुसल कौ, "महारॉज, मी पागल न्हैतियूं, पर मी सांचि बात कूणयूं। यौं बातों कें रॉज अग्रिप्पा खुद जाणनी, यैक लिजी मी उनर सामण निडर हबेर बुलायूं और मिक्कें विश्वास छु, कि इनुमिबे क्वे बात यॉस न्हैतिन जो उनुकें मालुम नि हो, किलैकि यौ घटना क्वे कवाण मिं नि हई। हे रॉज अग्रिप्पा, के तुम नबियोंक बातोंक भरौस करछा? मी जाणनू कि तुम भरौस करछा!"

यौ सुणिबेर अग्रिप्पाल पौलुस धें कौ, "के तु मिक्कें इतुक जलदी मसीही विश्वासी बणणक लिजी मनै ल्यलै?" तब पौलुसल कौ, "परमेश्वर करो, कि त्वी नै पर यौं सब लै जो ऐल मेरि बात सुणणई, एक दिन मेरि चारि बणि जाओ, यौं जंजीरोंक अलावा।"

तब रॉज और सभाक सब मैस ठाँड़ उठिबेर अलग जैबेर एक-दुसर धें बात करण लागीं, "यौ मैसल यस के नि करि रॉख जैक लिजी यकें मौतक सजा या जेल मिं खिती जाओ।" रॉज अग्रिप्पाल फेस्तुस धें कौ, "अगर यैल सम्राट धें अपील नि करी हुंछी, तब है सकछी कि यौ छुटि जांछी।"

## तूफानक बीच जहाज

(पेरितों २७:१-२६)

यैक बाद राजपालल यौ फैसॉल करौ कि उ पौलुस कें रोमी सम्राटक पास भेजो। यैक लिजी पौलुस और थ्वाड़ दुसॉर कैदियों कें लै यूलियुस नामक सुबदार कें सौंप दी गोय। और उ ऑशिया प्रदेश जाणी जहाज मिं भैबेर बाँट लागि ग्याय, और हम लै उनर दगाड़ गोयूं। दुसर दिन हम सब सिदोन मिं पुज्यूं, और यां सुबदारल पौलुस कें आपण दगडुवोंक घर जैबेर उनेरि मधत ली सकणक इजाजत दे।

यैक बाद फिर हम समुद्र कें पार करिबेर लुकियाक मुरा नामक बन्दरगाह मिं पुज्यूं। वां सुबदार कें एक पाणिक जहाज मिलौ जो इटली जाणी छी और वील हमुकें उमिं बैठा। भौत दिनों तलक माठू-माठ अधिल बढ़नै हम क्रेते द्वीप मिं पुज्यूं।

ऐल तलक भौत बखत बित गोछी और ऑब समुद्रक सफर करण और लै मुश्किल है गोछी, किलैकि ह्यूनक दिन उणिवाँल छी। यैक लिजी पौलुसल सबों धें कौ, "भाइयो, मिक्कें लागणौ कि हमर सफर भौत परेशानिवाँल ह्वल, हमुकें न केवल आपण माल और जहाजकि परेशानी उठूण पड़ेलि बलकिन

आपण जिन्दगीक लै।" लेकिन सुबदारल पौलुसक बातोंक बदाव जहाजक सैप और मालिकोंक बातों मिं जादे ध्यान दे। उ बन्दरगाह ह्यूनक दिन बितूणक लिजी भल नि छी, यैक लिजी जादे मैस वांबे बाँट लागणक विचार मिं छी। उ कसिकै फीनिक्स मिं पुजिबेर ह्यून काँटणक आँश मिं छी। यैक



तुफान मिं जहाज

लिजी उनुल लंगर उठा और पाल ताणिबेर वां फीनिक्स मिं पुजणकि कोशिश करण लागी। लेकिन फिर उ बखतै तूफानी हाव-बयाव चलण लागी। और जहाज तूफानक चपेट मिं ऐबेर हावक सामण बेबस हबेर बगण लागौ।

फिर दुसर दिन तुफान और जोरल चलनै रौ। यैक लिजी उं

जहाज कै हल्क करणक लिजी थ्वाड़ माल कै समुद्र मिं खितण लागीं। जब भौत दिनों तलक न सूर्ज, न क्वे तॉर देखियौ, और आँब तुफान और लै तैज हबेर चलण भैटौ, तब हमेरि बचणक आँश लै खतम है गई।

हमुल भौत दिनों बे के नि खै रॉखछी। तब पौलुसल हम सबनक बीच मिं ठाँड़ हबेर कौ, "भाइयो, भल तो यौ हुँछी कि तुम मेरि बात मानिबेर क्रेते बे बाँट नि लागना, तब हमर के नुकसान और हमुकै के परेशानी लै नि हुँछी। फिर लै मी तुमुधै गुजारिश करनू कि तुम हिम्मत धरो, तुमुमिंबे कैकै लै जिन्दगी कै के नि हो, केवल जहाजक नुकसानक अलावा। किलैकि मी जो परमेश्वरक सेवा और भक्ति करनू, वीक दूतल बेई रात म्यर नजिक ठाँड़ हबेर कौ, "पौलुस, तु झन डर, किलैकि तुकै रोमी सम्राटक सामण ठाँड़ हुणै छु। और देख, परमेश्वर त्यर कारणल यौ सब मैसों कै लै बचाल। यैक लिजी, भाइयो, तुम हिम्मत धरो, किलैकि मिकै भरोस छु कि जस उनर दूतल मिधै कौ, उं उस्सै करॉल। हम क्वे द्वीप बे टकरै जूँल, जैल हमर जहाज टुट जॉल, पर हम सब बचि जूँल।"

## जहाजकि दुर्घटना

(पेरितों २७:२७:४४)

आज यौ तूफानकि चौदू रात छी और हम इथां-उथां भटकणाछी। तबै जहाज चलूणियोंल चिता कि हम क्वे जाँगक सुकी किनार मिं पुजणयूं!

उनुकें डर लागणैछी कि कैं हम परखाँणों मिं नि टकरै जूं, यैक लिजी उनुल जहाज रोकणक लिजी वीक पछिनक तरफ बे चार लंगर पाणि मिं खिती और बेशबरील उज्याव हुणक इंतजार करण लागी। लेकिन नाविक जहाज बे भाँजण चाणाछी, यैक लिजी उनुल जहाजक अधिलक तरफ बे लंगर खितणक बहानल नॉन नाव कैं पाणि मिं उतारि दे। यौ देखिबेर पौलुसल सुबदार और सिपैनों धैं कौ, "अगर उं जहाज मिं नि रौला, तब हम नि बचि सकन।" यौ सुणिबेर सिपैनोंल नॉन नावोंक ज्यौड़ काटिबेर समुद्र मिं खिति देई।

जब उज्याव हुण लागौ, तब पौलुसल सबों कैं आपण दगाड़ खाँण खाँणक लिजी जोर दिबेर कौ, "भाइयो, तुमन कैं खाँण नि खाई और फिकर करन-करनै चौद दिन है गई। यैक लिजी मी तुमुधैं खाँण खाँणक लिजी बिनती करनू, यौ करण मिं तुमर भल छु। तुमुमिंबे कैकै बाव लै नि हराओ।" यौ कैबेर पौलुसल सबोंक सामण रूवट लिबेर परमेश्वर कैं धन्यवाद दिणक बाद उकैं टोड़िबेर खाँण लागीं। यैल सबों कैं हिम्मत ऐ और तब उनुल लै खाँण खा। जहाज मिं हम सब मिलैबेर द्वी सौ छियत्तर मैस छी। जब सब खैबेर भरी ग्याय, तब उनुल ग्युंक बोरियों कैं लै समुद्र मिं खितिबेर जहाज कैं हल्क करि दे।

जब सूर्ज निकलौ, तब उनुल एक खाड़ी देखी, जैक फेर मिं बउवै-बउ छी। उनुल उ देश कैं नि पछ्याण, लेकिन फिर लै उनेरि मंशा छी कि है सको तो जहाज कैं एक फेर मिं ठाँड़ करि दिंनू। पर जहाज पाणि भितेरक बउ मिं ठांसी गोय, और वीक पछिलक हिस्स टुटण लागौ। सिपैनोंल यस सोचौ कि कैं यस नि हो कि कैदी बाँ काटिबेर भाजि जाओ, उं उनुकें मॉर दिण चांछी। लेकिन सुबदारल पौलुस कैं बचूणक मंशाल उनेरि मंशा टाइ दे। वील हुकुम दे कि जो बाँ काटि सकनी, उं पैली फाव मारिबेर समुद्रक फेर मिं ऐ जाओ। और बकाय मैस तक्तों और जहाजक दुसॉर चीजोंक सहारल पछिल बे ऐ जाया, और इसिक सब मैस भली कैं सुकी किनॉर मिं पुजि ग्याय।

## माल्टा द्वीप मिं पौलुसक चमतकार

(पेरितों २८:१-१४)

जब हम सब समुद्र बे बचिबेर भ्यार पुज्यूं, तब हमुकें पत्त चलौ कि ऐल हम माल्टा नामक द्वीप मिं छूं। तब वांक मैसॉल हमुमिं दया करी और हमर स्वागत करिबेर आँग लै जगा, किलैकि द्वियो हुणल जाड़ है रौछी। जब

पौलुसल लाकाँड़ जॉम करिबेर ऑग मिं खितीं, तब अचानक ऑगक राफ लागणल एक स्यापल पौलुसक हात मिं काटि दे। तब वांक मैस उ स्याप कै पौलुसक हात मिं लपेटी देखिबेर आपस मिं कूण लागी, "पक्क यौ मैस खूनी छु, समुद्र बे तो बचि गो, फिर लै ईश्वरल यकै ज्यून रुणक लैक नि समझ!" लेकिन पौलुसल स्याप कै ऑग मिं छटके दे, और उकै के नि होय। पर उं सब मैस यौ इंतजार करणाछी, कि वीक हात सुजल या उ बिहोश हबेर मरि जॉल। जब उं भौत देर तलक इंतजार करनै मिं छी, और उकै के नि होय, तब उं आपण सोच बदेइबेर कूण लागीं, "यौ क्वे ईश्वर छु!"

यौ जाँगक नजिक वांक ठुल अधिकारी पुबलियुसॉक मैदान छी, वील हमुकै बुलैबेर तीन दिन तलक हमर खातिरदारी करी। जब पुबलियुसॉक बौज्यू जर और पेट कटाइल बिमार हबेर भितेर पड़ि राछी, तब पौलुस उनुकै देखणक लिजी भितेर गो, और प्रार्थना करिबेर उनुमिं हात धरौ, और उं चंग है ग्याय। और यौ सुणिबेर वांक सब बिमार मैस वीक पास ऐबेर चंग हुण लागीं। उनुल हर प्रकारल हमर मान-पान करौ। और जब हम तीन म्हैणक बाद उ जाँग बे दुसर जहाज मिं जाणाछी, तब उनुल हमर जरवतक सब चीज जहाज मिं धरि दे।

वांबे हम सरकुता मिं पुजिबेर तीन दिन तलक वै रयूं। वीक बाद हम वांबे घुमिबेर रेगियुस पुज्यूं, और तिसर दिन हम पुतियुली मिं पुज्यूं। वां हमुकै थ्वाड़ विश्वासी मिलीं, उनुल हमुधै विनती करी, कि हम उनर दगाड़ सात दिन तलक वै रुकूं।

## रोम मिं

(प्रेरितों २८:१५-३१)

यैक बाद जब हम रोमक नजिक पुज्यूं, तब वांक विश्वासी यौ बात सुणिबेर हमर दगाड़ भेट करणक लिजी आई। उनुकै देखिबेर पौलुस कै बढ हरीस हौ, और वील उनर लिजी धन्यवाद दे।

रोम मिं पौलुस आपण रुणक लिजी एक कम्म किराय मिं ली सकछी, पर वां लै उमिं नजर धरणी एक सिपै छी।

फिर पौलुसल वां रुणिवाल्ल यहूदियोंक खाश मैसों कै बुला, और जब उं सब ऐबेर एक दगाड़ जॉम हई, तब वील उनुधै कौ, "भाइयो, मील आपण जाति और आपण पुरखोंक रीती-रिवाजक खिलाफ के नि कर, फिर लै मिंकै यरुशलेम बे बन्दी बणैबेर रोमियोंक हात सौपि गो। उनुल पत्त-पाणि करणक



बाद मिक्केँ छोड़ि दिण चा, किलैकि मिक्केँ मौतक सजा दिणक क्वे कारण नि छी। जब यहूदियोंल विरोध करौ, तब मिक्केँ सम्राट धें अपील करण पड़ी। पर मी आपण जाति मिं क्वे दोष नि लगूण चांछी। यैक लिजी मील तुमुक्केँ यां बुलवा, कि मी तुमर दगाड़ भेट-घाट करिबेर बात-चीत करुं। किलैकि मी यैक लिजी बादी छूं कि मी तुमरै चारि परमेश्वरक यौ वैद मिं भरौस करनू कि उं आपण मैसों कैं बचाल।"

यौ सुणिबेर यहूदियोंल पौलुस धें कौ, "यरुशलेम बे त्यर बारि मिं हमुक्केँ क्वे चिट्ठि नि मिलि, और न क्वे खबर मिलि। लेकिन हम तेरि बात सुणणक लिजी तैय्यार छूं, किलैकि हमुक्केँ यैक बारि मिं यौ मालुम चलौ कि सब जांगॉक मैस यैक खिलाफ मिं बात करणई।"

तब उं एक दिन तय करिबेर पौलुसक पास आई, और पौलुसल उनुकें परमेश्वरक रॉजक बारि मिं समझा और मोशेश और नबियोंक लिखी किताब बे यीशुक बारि मिं उनुकें समझणक कोशिश करी। और थ्वाड़ मैसोंल वीक बात मिं भरौस करौ, लेकिन औरोंल भरौस नि कर।

तब पौलुसल उनर जाण बखत कौ, "पवित्र आत्माल यशायाह नबीक जरियल हमार पुरखों धें ठिक कौ,

"तुम म्यर बात तो सुणला, पर नि समझला। तुम म्यर काम तो देखला, पर उनर मतलब नि जाणला। किलैकि यों मैसोंक मन निठूर है गो, और यों कानोंल नि सुणन, आंखोंल नि देखन, और दिमागल नि समझन। यैक लिजी उं मन फिराव नि करि सकन, जैल मी उनार पाप माफ करुं।"

आब तुम जाणि लियो, परमेश्वरक मुक्ति अन्य जातियोंक लिजी लै छु, और उं यकै मानॉल।"

और जब वील यौ सब बात कै हैछी, तब यहूदियोंल आपस मिं यैक बारि मिं बाद-विवाद करनै वांबे न्है ग्याय।

तब पौलुस आपण किरायक घर मिं पुर द्वी साल रौ, और जो वीक पास उंछी, उ वीक स्वागत करछी। और निडर हबेर यीशु मसीक बारि मिं सिखूनै रौ।

*धर्म-शास्त्र हमुक्केँ यौ नि बतून कि अधिल कै के हौ। पर हमुक्केँ दुसॉर लेख और पुस्तकोंल मालुम छु कि विश्वासियों मिं भौत सताव हौ। यां तलक कि पौलुस और पतरस कैं लै मरवै दे। पर प्रभु यीशुक भलि खबर दुनियाँक चारों तरफ फैल गई। भौत मैस माननी कि थोमा, जो प्रभु यीशु मसीहक खाश शिष्यों मिं बे एक छी, वील भारत मिं ऐबेर प्रभुक संदेश फैला। दुसॉर मैसोंल प्रभुक बचन अफ्रीका और यूरोपाँक देशों मिं लै फैला। पुर दुनी मिं मैस यौ सुणिबेर कि प्रभुल हमार लिजी एक मुक्तिदाता कैं भेजि रॉखौ भौत खुशि हई।*